











浙東圖書館藏

浙東圖書館藏

浙東圖書館藏

浙東圖書館藏

浙東圖書館藏




浙東圖書館藏

范忠宣公文集卷第六

古香表

安州通判到任表

臣某言伏奉勅命依前朝奉郎守侍御史通判安州軍
 州事已於今日某日到任訖者進思盡忠乃臣子之常
 節退人以禮蓋君父之至慈俯仰戴天凌兢踟地申謝
 竊以昔在治隆之世多求諫爭之臣謂聰明不足以自
 勞故耳目必資於正助仁皇嘗行此道以致太平先臣
 適會茲時屢陳讜論洪惟繼統之始深慮守成之難方
 求正人俾在言路而臣學非臻古才不適時非由左右
 之薦揚獨以家世而掄選處之憲府加以法冠敢顧已
 以偷榮遂竭忠而論事朝廷方行於大典理必正名廟



長政海

堂欲遠於初謀惡其異已言皆不用分固難安投劾告
歸閉門待罪本忘身而徇義庶盡節以報君鼎鑊加誅
乃其始望雷霆收怒敢意復生尚作貳車之行仍居緩
服之近人皆閔其遷謫臣實謂之恩榮此蓋伏遇皇帝
陛下睿知察微寬仁容物謂誠心可諒止於愚直以無
它雖然敵在前不使毀傷而過甚保全至此感幸何涯
臣敢不益勵孤忠勉堅素節死而後已希先哲之遠圖
知無不爲疇聖君之大德臣無任

信陽軍謝上表

喧訟亟興駭人情而莫測誣辭終辨蓋天聽之難欺忍
從推究之明感極矜容之大中謝竊念臣性資愚淺學
行迂疎仕緣家世而聞進乏左右之助先帝慎臺閣之

選嘗被甄收陛下求諫爭之臣首叨東拔自謂大恩之
難報誓竭忠勤詎知適道而寡權動貽悔咎暨屢蒙於
器使卒無取於寸長僅同鼯鼠之五窮徒過古人之三
黜向由罪戾之迹驟當帥領之名詔命初頒已致有司
之駁議懇辭弗獲遽承中旨之促行果貽負乘之羞自
速簡書之謗內辜朝寄外辱將權省愆甘竄於遐荒屈
法至煩於全度此蓋伏遇 皇帝陛下堯雲溥覆湯網廓
開記憐舊物之微闊略小臣之過止鐫閣籍尚畀軍麾
矧松楸之匪遙復土風之不惡田寬穀賤民樸訟稀蚩
蚩本樂於太平斷斷或成於靜治庶收來效少塞愆尤
臣無任

謝換朝散大夫直集賢院表

臣某言閏九月二十五日進奏院遞到敕誥各一道特授臣朝散大夫直集賢院仍加上護軍差遣賜如故者承流居外荷謫命之寬優渙汗從中拜恩榮之併至省躬無地蒙施若天中謝伏念臣學不知方戇唯拙守濫霑祿仕自託公朝先帝采其家聲擢居言路陛下博於器使驟玷清班每投劾以下遷輒掩瑕而收用向冒邊防之寄猥分節制之嚴奉陛下之訓辭識先臣之遺教謂宜綏靜而復紛紜旣速煩言且無善狀至千吏議甘擯棄於明時獨賴君恩獲安全於散地豈期簡記靡俊終更因宗祀之慶成易官名而還職朝家新制遽叨等級之榮書館舊遊再竊光華之選仍加勲號盡出洪私式示優遷非徒起廢此蓋伏遇 皇帝陛下體天洪覆秉

道建中恢全德以博臨憲先猷而致治謂臣闕闕之後
雖屢試以無成憫臣齒髮將衰俾自新而圖效致茲寵
獎下及孤孱臣敢不仰體深仁俯追往咎居官弗懈庶
無門戶之羞論報何階猶存簿書之責臣無任

同天節進功德䟽表

伏以純軋盛旦甲觀聖期爰修梵席之儀願效華封之
祝臣職縻符守望遠槐宸稱觴執玉之庭莫陪盛禮修
貢布金之地但集勝因泰元增授策之休上帝永與齡
之福臣無任謹具功德䟽表上進以聞

又

伏以朱明戒候真聖挺生前彌月之盛期效祈年之善
祝臣州符是守宸扆方遙仰望堯雲莫預大庭之列遠

陪嵩嶽徒稱萬歲之聲

慰皇帝表

臣某言伏奉中書門下牒降到十月二十日太皇太后遺誥臣即時與本軍官吏舉臨掛服訖禍鍾長信哀激中宸下逮蒼黔同深悲愴伏以太皇太后功超十亂德厚三朝輔仁宗與子之明啓先帝繼天之業徽猷冠古陽賜在民方期萬壽之遐奄棄二宮之養恭惟皇帝陛下誠深舜慕孝篤天心痛問寢之長違悵陞僊之莫返然而逝川難遏大化必遷伏望俯抑聖情勉從禮節寬慈闡之至念副宗祐之永依臣以官守所拘不獲奔詣闕庭

進南郊絹表

伏以大祀歲儀方盛禋天之報羣方效職宜修任土之
誠前件絹歲賦所輸邦經攸羨媿乏筐織之美幸供庭
實之繁干冒宸嚴臣無任

河中府謝上表

伏奉誥命差權知河中軍府事已於今月十二日到任
訖養痾竊祿早蒙從欲之仁起廢叨榮再玷惟良之選
大恩曲被感涕交零中謝伏念臣生偶昌期幼承先訓
才疎學淺志廣識微荷先帝之誤知擢居言路遇大明
之繼照首玷清班嘗簪筆於螭頭復建牙於玉塞曾乏
涓埃之報旋貽負乘之羞奇薄易艱踈拙多罪每蒙容
覆未即竄誅頃以積釁招殃私息多故由賦情之滯塞
至得疾於悲傷疲駑雖切於戀軒荒忽詎任於陳力冒

至慈而瀝懇獲閑局以偷安甫閱再暮忽更優寄矧河
中古郡陝右奧區表裏山河地交馳於使傳足給兵食
民荐困於賦輸宜得名臣倚爲良翰豈容孱菲可副東
求此蓋伏遇 皇帝陛下廣度包荒至明燭遠 堯仁
而天覆邁湯聖之日躋憐舊物而弗遺無一夫之不獲
有如羈賤尚在采收敢不策勵昏愚罄竭忠義頒宣聖
澤撫養疲疇誓於損糜以爲報稱

慶州謝上表

伏奉詔命特授臣直龍圖閣權發遣慶州軍州事兼發
遣環慶路經略安撫使兼馬步軍都總管公事已於今
月初三日到任訖內閣圖書復登於顯地藩方印紱還
守於故封恩榮曲被於訓辭瞬息但驚於歲月彷徨自

失踣躄難安 中謝 伏念臣樸樾散才迂踈淺識因緣世

闕遭遇聖時鼯鼠多窮徒施於五技鷦鷯自足常守於
一枝入踐諫垣出持使節雖數更於眷任常抵冒於譴
訶求散地以置身荷公朝之從欲自安遲暮絕望進升
假守河壩方愧麾符之寵統兵塞上俄兼連帥之權此
蓋伏遇 皇帝陛下天授睿文日躋俊德善貸不遺於
舊物噓枯特借於殊恩衰拙無堪齒髮僅同於蒲柳忠
勤自效涓埃覬展於桑榆

又 上詞同前

太皇太后殿下保佑皇家統持大業政自修於帷幄德
已被於海隅噓枯無間於寒芟求舊不忘於遺履故茲
衰晚亦預柬求臣敢不宣布上仁懷柔遠俗奮揚弱翮

乘時猶待於一鳴策勵駑駘竭力尚期於十駕

辭免天章閣待制表

今月九日都進奏院遞到誥命授臣朝議大夫充天章閣待制差遣勲賜如故者斗筲之器常懼滿盈天地大恩豈宜忝冒中謝伏念臣秉心拙懦涉世迂踈託先臣之緒餘叨聖朝之祿仕偶超末路獲玷清途當英皇御極之初擢居言職會先帝承祧之日復在諫垣一無建明再取罪戾起廢旋霑於雨露包荒實賴於乾坤預八使以觀風假一麾而出守俄升內閣俾治西州雖夙夜以在公終負乘而致寇尚蒙善貸得逭嚴誅去國累年屢轉萍蓬之迹愛君一志常傾葵藿之心遼水猶冀於鶴歸荆山遽悲於龍去皇明嗣統聖治惟新適當兵賦

之餘尤重邊防之寄特還故職再領舊封任總連城時
方累月遽膺寵數遂越衆人況素乏於事功恐難堪於
侍從雖大君之命義不當辭然匹夫之誠志有難奪伏
惟皇帝陛下聖文天縱睿智日躋邁虞舜之聰明繼
商宗之恭默正人彙進率土阜安豈茲孱微敢當東拔
非矯情而固避懼過分之難勝仰祈宸嚴追寢成命力
小任重實畏於官箴天高聽卑願從於人欲

又

太皇太后殿下坤儀厚載天德高明化已冒於海隅政
允修於帷幄正人居位多士向風豈資孱微敢當東拔
非矯情而固避懼過分之難勝仰祈宸嚴追寢成命
賀立皇太子表

離明有繼震器攸歸正朔所加歡愉遐暨中賀臣聞遂

古以降謳歌或尚於歸賢逮夏而來歷數丕承而與子

恭惟皇帝陛下憲天立極體道宅師以謂下武繼文

有以終光華之運唐堯授舜使之繼魏蕩之勲爰因冢

嗣之良肇峻青宮之慈問安視膳日滋孝友之聲監國

撫軍允係天人之■旋源䟽衍焉奕靈長臣限守方州

久叨睿睠阻趨丹陛徒溢深衷■

謝給事中表

去國彌年方再臨於西壘還朝不日遂升隸於東臺仍

參帝幙之游以待聖謨之及衆知其寵臣則甚慚中謝

伏念臣生匪異材長唯拙守在官論事既無經遠之謀

為政治民又乏可書之績徒以朝廷之樂善或緣家世

以用人已廢復興雖窮若達遠四方之承化與萬物以
歸心忽於鼓舞之中荐被甄收之渥黃扉嚴近遽使叨
居黼座燕間獲從勸講器能甚薄職守過優豈聖人之
乏人乃宸衷之念舊懇辭弗獲虛受爲慚此蓋伏遇
大皇太后殿下淵懿內充聰明旁燭酌民言而布政公
天下以爲心致使衰遲亦蒙柬拔敢不深思官守屏去
身謀務通中外之情勉究聖賢之蘊腐儒已老雖非適
用之材善政日新姑盡可陳之力

又

瑣闥要官經帷異選自唯衰晚猥玷詳延旣辭命以靡
從遂冒恩而居次中謝伏念臣受材迂拙臨事闕踈祇
由門戶之相傳得與衣冠而並進謬更煩使淺步清塗

志敢望於有成言以狂而無補謗雖不免寵亦繼來知
無後效之可圖每愧先朝之再造及陛下重明委照麗
澤旁流方悉力以乘邊敢萌心於處內既升要近復賜
召還新政方行已喜朝聞之道舊游如夢更分夕拜之
榮俾入講於金華將親承於玉色其爲幸會遠絕尋常
此蓋伏遇 皇帝陛下聖道生知孝思善繼緒正朝廷
之大體述成祖考之遺謀布政之初以人爲急如臣不
肖被矐尤深父子遭逢雖在一門之內君臣際會凡叨
四聖之知施及衰年併蒙殊獎內惟白首殆種種以無
堪顧有赤心尚惓惓而自奮臣無任

謝對衣金帶表

睿恩申命顯服頒榮冒寵無堪撫躬增愧中謝伏念臣

性資淺陋學術迂踈備官無補於涓埃竊祿分甘於冗
散遽陪法從復假徽章此蓋伏遇 太皇太后殿下發
政惟新用人求舊持隆異數加惠適臣拜賜知榮益勵
竭忠之節捐軀圖報冀無虛受之羞

文

便蕃寵命過推三錫之恩煥爛徽章加賜九鐶之帶德
非稱物慚已厚顏中謝伏念臣鼯鼠之技易窮駑馬之
才屢試起之散地遽分守將之權收寘近班復玷從官
之列重頒異數併示眷私此蓋伏遇 皇帝陛下曲借
寵光增輝擢櫟拜而受服敢忘彼已之譏束以立朝益
勵匪躬之節

謝賜萬年縣君冠帔表

誠意冒聞睿慈下逮靡從改授曲示匪頒顧同產之遭
逢見異恩之特達中謝伏念臣早緣忠教寢服榮階尸
祿已多在公奚補雖弟兄之並仕顧姊妹之寡存偶因
可請之恩願易從中之賜敢圖聖念深軫私門遂使遺
嫠坐蒙華寵被之首服可慚圭竇之卑煥若霓衣如自
璇霄之降榮逾所望感極何言此蓋伏遇 太皇太后
殿下體道安民示慈愛物靡間幽微之賤兼存衣被之
功更以先臣賁其遺體寵均在笥置私室以光華徒有
同胞望公朝而感泣

文

恩在令中方瀝肺肝之請寵由意外遂霑手足之私雖
加美於一身實增光於兩族叨榮為幸報賜何階中謝

竊以御人臣之衆而知念其私家憫公卿之勞而不忘其後世求之在昔已曰希逢而況事非出於故常澤徧加於內外實爲殊遇蓋異泛恩唯是女兄蕞然嫠婦佩帨即事早悲託體之同恤緯在庭未遂飾身之請微誠仰達聰聽下臨特頒冠服之華不易衣裳之賜愬由上出榮可家藏此蓋伏遇 皇帝陛下善與人同聖由天縱親奉神宗之遺澤緬思仁祖之任賢念及寡居曲爲華飾庶家聲之不泯知德賞之有由唯是孤臣將何報國拜天子之命幾顛倒於裳衣比大夫之妻更增華於車服臣無任

賀獲鬼章表

臣某言伏覩熙河經略司奏今月十九日洮東安撫种

誼領兵至洮州擊敗鬼章軍活捉到鬼章者天威昭赫
師律訓齊深入妖巢生致渠首中謝竊以裔夷小醜獷
獸爲心蒙被國恩不加報復侵犯邊圉數有震驚遂敢
交通種羌結爲黨與解仇合意同隙成謀賊傷屬國之
人竊據乘障之地先朝所不忍賞聖筭嘗此留心至于
罪稔禍盈天棄神怒偏師纔出元惡就擒昔高宗鬼方
至于三年漢元郅支遠在萬里而皆斬馘血刃之功率
非係頸獻囚之事矧其稽積歲月勞勩師徒豈如廟略
無遺虎臣思奮曾未旬浹已報翦夷吉語亟聞戎捷交
上雪邊人夙昔之憤奪諸羌前却之心追視古先莫可
倫比伏惟 皇帝陛下神武天縱睿謀日新任衆材而責
成因常德以立事運陶鈞而獨化其易轉圜罩上仁以

大同既思率服仰繫睿筭逮此成功臣等叨預弼諧無
裨洪造奉承嘉慶徒切歡愉臣某等無任

又

天網無私本非好殺神理助順叛者自亡曾是偏師之
出疆遂聞元惡之授首諸戎震疊西鄙肅清中賀伏惟
太皇太后殿下天覆四方坤載萬物好生之德發於自
然柔遠之功覃於無外昆蟲草木咸知此心天地鬼神
陰相其業顧西蕃之遺種孤累聖之鴻私頃在熙寧之
間誘陷思立之衆置而不問猶覬知恩爵秩兼隆賜予
不絕而廼潛結西夏攻圍南川焚蕩傷夷動以萬計發
掘驅虜不可數知築據臨洮傲睨天討當宁太息念疆
場之無辜諸將激昂知背誕之不赦兵刃既接凶黨奔

亡臨衝未施壁壘自破老羌奪氣白首就擒即聽檻車
之行以正藁街之戮乃者托跋小醜憑恃解仇之謀猖
狂大言陰蓄窺邊之計胥亡則齒知難久臂解則肩不
自持料其破膽之餘類塞無日信矣得天之助本於愛
物之誠臣等鎮撫無功黽勉備位仰依干羽之化庶覩
兵革之藏欣戴之心倍萬倫等臣等無任

謝賜御書表

元祐丁卯九月十六日賜

右臣等伏望聖慈各賜御書一軸者帝謨濟哲有以知
天縱之能宸翰昭回乃獲觀雲章之盛墨妙周於物覩
聖心著於日新臣等叨備弼諧猥承睿睠雨露之澤方
丘山而莫逾子孫之藏與鼎彝而增重臣無任

又

金華畢講宴需既示於深慈雲漢垂章宸藻嗣隆於厚
睠窺聖造之超詣知天縱之絕倫繇慈訓之夙成審睿
謨之日就臣等自惟近器得備邇隣荷寵賜之不貲循
懦心而載抃

進節尚書論語表

臣伏觀今月十五日以經筵講畢論語賜執政及講讀
官御筵是日內出皇帝御書唐賢律詩分賜臣等次日
於延和殿簾前占謝蒙太皇太后宣諭 皇帝好學在
宮中別無所爲唯是留心典籍天下幸甚天下幸甚臣
伏思 皇帝陛下睿哲之性出於天縱而復內稟慈訓
日新典學誠以堯舜三代爲法則四海不勞而治今來
論語終帙進講尚書二書皆聖人之格言爲君之要道

願陛下念茲在茲以廣聖德臣職在輔導無能裨補輒於尚書論語及孝經中節取要語共一百段進呈聖人之言本無可去取臣今唯取明白切於治道者庶便於省覽或游意筆硯之間以備揮染亦日就月將之一助也干冒宸嚴臣無任

穎昌府謝上表

臣某言伏奉詔命除授觀文殿大學士右正議大夫知穎昌軍府事充京西北路安撫使已於今月九日到任訖者袞紱再紆尤積妨賢之咎錦衣未改更叨入里之榮復秘殿之隆名進治宮之崇秩恩私曲被感涕無從中謝伏念臣以一介之微生遭千年之盛際立身寡與但遇聖明謀國何功遂諧丞弼乏勤勞之濟務徒內外

以尸官一昨召自鄉邦再司政筆氣與神而俱耗老隨
病以交侵瞻視不全識慮尤短譬木心之已朽安所取
材顧鼎足之弗疆唯憂覆餗比以人言而自訟終煩聖
度之含容待其疲極而不支然後逡巡而得請仍加異
數付以舊藩兼出入之恩輝盡始終之體貌益爲僥倖
有覲心顏此蓋伏遇 皇帝陛下體道曲成上仁兼覆
念嘗充位幸樸櫟以無它雖或誤朝由衰遲之已甚不
止奉身而善退仍容假寵以榮歸然臣被遇三朝徧更
二府壯年遇事冀有補於萬分晚歲得君竟無稱於一
善尚累撫民之寄徒懷去國之慚誓以餘齡更疇洪造
臣無任

謝賜詔書表

伏蒙聖慈特降詔書以臣上第三劄子乞宮觀不允所
請者需章既上宜干僭黷之誅溫詔發中曲諭眷存之
旨仰荷矜憐之及此不知涕泗之無從中謝伏念臣以
空乏之資遭休明之運進預宰司之密勿退諧鄉閭之
便安寵祿滿盈慮常憂於瞰室視瞻耗眊行幾至於索
途內自省循義當屏伏俾安厥位有愧于顏此蓋伏遇
皇帝陛下體虞舜之聰明邁周家之忠厚隆使臣之異
數廣成物之深仁肆令罪戾之餘猶竊循良之寄臣敢
不虔遵聖訓祗服官箴恩愧未醕勉就承流之效疾如
終廢即祈解組之歸臣無任

隨州乞致仕表

老及已昏固難尸事目盲當廢寧復成人雖居譴謫之

中敢露肺肝之請覬天威之曲霽幸物性之獲全

中謝

伏念臣材乏寸長器非遠用徒承先闕被遇累朝曩緣
聖眷之隆遂竊宰司之重立朝無補蓋鮮嘉謀出位有
言自干明憲沐上恩之寬貸守邊郡之優閑而臣老病
交侵雙瞳並瞽初猶粗分於白黑今則全廢於視瞻簿
書盈前唯吏言之是狗賓客在坐須相者而後知詎堪
率屬以長人何以承流而化俗輒冒冕旒之聽妄求田
里之歸然臣名在刑書身罹罪罟省愆報國當誓捐軀
告老乞骸豈爲知退若非喪明於已衰之境尚當戮力
於垂盡之年審難自效於涓塵故敢上訴於君父伏望
皇帝陛下回日月之照天地之仁矜其昔玷於鈞衡憫
其已儕於矇瞍許還故土俾養殘齡擿殖寘行已迷於

歸路回智反察終悟於昨非洪化無私餘生是託

永州謝表

臣某言准告責授武安軍節度副使永州安置已於今
月十一日到永州訖孱愚誤國痛往咎之莫追聖哲當
天詎明刑之可逭曲從寬典止竄遐陬泣血銜恩隕心
知罪中謝伏念臣器能淺陋學術迂踈藉閥閱之餘資
竊朝廷之顯仕度量力每深負乘之憂冒寵叨榮果
積山嶽之釁擢髮宜尸於兩觀分符尚玷於一麾未正
嚴科難逃公議諒惜陞廉之體特寬斧鉞之誅貸其桑
榆以禦魑魅身縈篤疾已傷兩目之盲舟覆長江僅救
全家之溺旣緣自取爲幸猶多此蓋伏遇 皇帝陛下日
月照臨乾坤覆載法比漢章之約仁同湯網之開矜至

簪履之餘曲加涵育憐臣帷幄之舊尚俾生全致是疋
殘苟延視息臣敢不刻肌遷善沒齒恩愆永同湖海之
民均被唐虞之化餘齡向盡唯冀於首丘洪造未疇敢
忘於結草臣無任

謝復觀文殿大學士充中太一宮使表

竄逐餘生分永捐於荒服光輝旁燭遽復齒於清望
溢中情恩踰再造中謝伏念臣學非經世智不逮人荷
累聖之深知躡羣髦而驟進召從藩國入奉宸居一秉
樞衡再參揆路人微責厚恩重命輕徒知竭盡於愚誠
冀或少裨於聖治恩忘分守冒進煩言亟蹈危機屈從
輕典屏居湖外屢易歲華疾病交浸疋羸就盡陛下昭
陞寶祚特霈鴻私嘉與物以咸新視前垢而皆滌悉收

故物猥及微臣顧罪戾之同時有死生之異趨如臣疲
病猶是生還荷大施之無涯畢此生而寧報何期眷意
益服便藩寵還秘殿之名兼以殊庭之職招驚魂於百
粵薰嘉氣於長安心游魏闕之前夢入甘泉之仗然臣
雙眸俱廢寧瞻舜日之光一體偏枯永絕堯階之奉自
憐衰薄徒際盛名濫被休光唯知感涕殊常之遇既不
敢以飾辭迫切之情亦少祈於俯徇伏惟 皇帝陛下
天地大德日月兼明欲從不違所私官使必量其度恢
其餘照鑒此衷誠許令養病於丘樊尚期擊壤於聖世

謝賜詔書銀合茶藥表

使華臨降有問勞之寵書天語甚溫錫扶衰之珍劑寬
魄稍收於去幹體貌已同於近司恩眷逾涯感傷繼泣

中謝
伏念箕裘世業惟墜舊臣竊過實之虛名冒公朝
之重任每欲輸誠而許國不圖違衆以誤時愛君不敢
殺身省咎但知闔戶偶逢興運復振孤蹤特還秘殿之
名俾使殊庭之職寵榮已極報稱謂何此蓋伏遇 皇
帝陛下全度包荒常善救物默運聖神之造遠追堯舜
之隆知臣盛壯之時察臣朴直之節猶於衰朽欲備諮
詢而臣步趨甚難豈足班於廣內視瞻已廢甘絕望於
清光敢丐殘骸歸休故里桑榆既暮難效力於明時鐘
漏有期徒懷忠於晚節臣無任

范忠宣公文集卷第六

宣公文集卷六

...

...

...

...

...

...

...

...

...



范忠宣公文集卷第七

謝賜銀絹宣醫表

臣伏蒙聖恩特降中使賜臣銀絹五百疋兩及宣押醫官醫治者膚使倏臨挾侍醫於帝所中金加錫副縑帛於篚將寵至而受之若驚感極而繼之以泣

中謝

伏念

臣識非致遠學昧知方志徒類於畫墁名猥同於畫餅旋貽罪戾卒玷公朝將九死以是濱豈三已之爲愠仰銜矜貸復俾生還載去炎陬悅游赤縣使車還至恩禮彌隆眷蔭室以生輝愧微軀之匪稱醫治問勞戴天地之殊私衣被駢蕃佩聖神之深恤此蓋伏遇

皇帝陛下

本堯仁之蕩蕩掩舜功之巍巍不徧其爲急先所務詳於禮賢而寬其轡策周於養老而簡其功程故此衰遲

猶膺眷注臣敢不勉親藥石益適寒温冀保餘齡仰醜
洪造庶幾體大君之愛育將以刑列辟而勸忠臣無任

謝歸潁昌私第表

忱辭屢貢浥醜汗以方滋綸旨再頒奉恩俞之至渥

中

謝伏念臣授材苦窳賦性顛蒙猥遇昌辰爰英柄任肆
調商鼎思謹法以致和祗適漢規敢狀常而易作卒緣
昧陋深負東求再去巖廊迄投荒徼曷其晚節益被殊
私然臣疾病侵陵精神濩落寵還舊秩愧竊叨榮矧以
庸虛更蒙欽佇唯君子之懷道譬韞玉以待沽邈千載
之或逢豈一朝之可偶所以涓上之老養黃耆而方來
淄川之儒雖白首而猶起真心啓沃致時熙平士所願
爲人寧自廢以臣遲暮殆類昔賢如臣遭逢豈謝前輩

然嬰羸瘵莫副詳延悵時命之多屯際風雲之難會徒
仰休明之治阻陪英俊之躔貪戀聖時唯知彊飯何臣
功之眇末重天德之博臨盍趨召節而駕不俟行輒籲
皇穹而辭非獲已深蒙假息弛鞭策於旣疲當佩隆恩
指丘園而自佚此蓋伏遇 皇帝陛下恩仁博洽盛德
敷施本二帝以親賢憲三王而養老憫勞以事不程其
功命豈非常情知忝冒捐軀報國嗟朽質之無堪雅意
本朝尚精誠之未泯臣無任

謝賜國醫高章章服并批語表

私旨冒開蓋恃聖君之含貸特恩如請更窺天語之温
純曲被丁寧唯深殞越 中謝 伏念臣頃緣遭遇過竊寵
靈不戒滿盈自取顛覆擠九淵而難拯視萬鬼以爲隣

伏遇 皇帝陛下纘服當天體仁澤物務為蕩滌施及
 疐殘拔之於既死之中還之於絕望之後官名悉復里
 閭得歸因遣侍醫隨療沉瘵既更生而為德仍起廢以
 推慈力盡出於公家心靡遑於私室輒殫危懇妄有哀
 祈敢謂聖神重矜朽憊與收湯熨之勤效且非藩飾之
 常恩併受訓詞示存眷待俾在桑榆之境更効菑蕘之
 忠況臣世忝簪裳心非木石雖抱積衰之恙敢忘再造
 之仁伏枕待終將何裨於君父捐軀報上當更勅於子
 孫臣無任

乞致仕表

聖神撫運雖盛世之罕逢耄耄臨年顧羸骸之難強況
 此沉痾之久始獲故里之還安敢叨逾更貪寵祿輒上

乞身之請願推從欲之仁

中謝

伏乞臣材匪他長器止

近用豈識古人之大體徒募先世之清芬遭遇聖時寅
緣膺仕力小任重既乖先覺之明福過災生遂致疾顛
之咎竄投窮徼羈愁累年敢晞■櫟之終全已分江魚
之同葬忽遇皇帝陛下資始以出庶物繼明而照四方
枯芟再榮幽蟄盡起曠然大宥全以至仁寄優任於真
宮兼寵名於秘殿復玷惟新之渥愈光殆盡之軀然念
臣疾病交侵精神久憊媿君恩之過厚慮神理之害盈
願掛朝紳就棲農畝伏望 皇帝陛下道隆善貸德務
曲成不奪志於匹夫能有容於一介閔茲誠確特賜俞
從儻垂暮之桑榆俾安退跡類向陽之葵藿終亦傾心
臣無任

遺表

臣聞生也有涯難逃定數死之將至願畢餘忠輒留垂
盡之期仰瀆蓋高之聽伏念臣賦性拙直稟生艱危忠
義雖得之家傳利害率同於人欲未始苟作以干譽不
敢患失以營私蓋嘗先天下而憂期不負聖人之學此
先臣所以教子而微臣資以事君粵自治于擢爲御史
繼逢神考進列諫垣荏苒五十二年首尾四十六任分
符擁節持橐守邊晚叨宥密之求再席鈞衡之寄遇事
輒發曾不顧身因時有爲止欲及物固知盈滿之當戒
弗思禍亂之陰乘萬里風濤僅脫江魚之葬四年瘴癘
幾從山鬼之游忽遭睿聖之臨朝首圖織介之舊物復
官易地遣使宣恩而臣目已不明無復仰瞻於舜日身

猶可勉或能親奉於堯言豈事理之能諧果神明之見
嗇未獲九重之入覲卒然四體之不隨空慚田畝之還
上負輒坤之造猶且強親藥石貪戀歲時儻粗釋於沉
迷或少紓於報効今則膏肓已迫氣息僅存泉路非遙
聖時永隔恐叩闈之靡及雖結草以何爲是以假漏偷
生剗心瀝懇庶皇帝陛下清心寡欲約已便民達孝道
死有餘恨伏望皇帝陛下清心寡欲約已便民達孝道
於精微擴仁心於廣遠深絕朋黨之論審察邪正之歸
搜拔幽隱以盡人材屏斥奇巧以厚風俗愛惜生靈而
無輕議邊事包容狂直而無易逐言官若宣仁之謗
未明致保祐之憂勤不顯本權臣務快其私忿非秦陵
實謂之當然以至未究流人之徃愆悉以聖恩而特叙

尚使存沒猶汗瑕玼又復未解疆場之嚴幾空帑藏之積有城必守得地難耕凡此數端願留聖念無令後患常軫淵衷臣所重者陛下上聖之資臣所惜者宗社無疆之業苟斯言之可采則雖死而猶生淚盡辭窮形留神逝

奏狀

辭免給事中兼侍講狀

右臣今月某日准閣門告報除授臣依前官試給事中兼侍講勲封賜如故者臣切以門下封駁之職實惟機要出納之司苟非公忠正直之人無以振舉綱條論議得失選任所重實難其才伏况陛下日親儒臣啓發聖學勸講帷幄敷陳典訓必得經術行誼之士厚重端方

之臣緝熙光明陪侍左右臣久去朝廷待罪外官識
闇淺記問涉獵加以衰遲心神耗廢學憂不講經患不
明將何以供奉禁密仰承訪逮兼是二職皆非所堪聞
命震慄靡所容措又臣與司馬光舊為姻戚臣隸左省
義亦有嫌伏乞天恩特許引避亟收誤寵遴東衆賢必
得時髦以副眷委所有告命不敢祇受伏望聖慈特賜
寢罷

謝牽復右正議大夫提舉崇福宮狀

老臣流竄餘生衰羸待盡甘斃荒徼絕望聖時伏遇
皇帝陛下特賜矜憐脫其罪罟復還爵祿許就田里旣
骨而肉恩實再生然臣犬馬已疲報國無路歸骸有日
結草是期

謝復觀文殿大學士充太一宮使乞免供職

狀

伏奉詔命授臣前件職任已於當日望闕祇受訖兼准尚書省劄子奉聖旨令臣供職臣聞命皇恐感涕不已伏念臣遭遇累朝寵祿過厚才德不稱自取顛覆昨在湖外綿歷歲時侵冒炎蒸損耗氣血日就羸弱瀕於死所戴盆之下絕望於天豈謂恩光照臨復還爵秩許歸鄉里在於老臣已踰分願更蒙寵增秘殿之名兼領殊庭之職仰惟聖恩糜殞難報臣固當勉彊趨赴闕廷一聆德音然後退就丘樊死無所恨然臣才短分薄福過蓄生昨六月內到鄂州忽患左手足不舉至今醫治未見痊減重念臣素來氣弱齒髮早衰加之垂老之時

殘日甚一體偏廢兩目全瞽雖欲驅策疲蹇有所不
伏望聖慈曲賜矜憐俯加卹察特免供職許歸鄉里以
養殘年臣若萬一尚延朝露猶與農夫田父歌詠聖化
臣無任

劄子

辭免吏部尚書第一劄子

臣昨日竊覩中書錄黃忽蒙聖恩除臣吏部尚書臣揣
分驚惶通夕不寐伏念臣資性愚短學問荒踈偶遭聖
明獲踐臺閣終緣狂瞽屢觸憲章陛下拔臣於罪戾之
餘置臣於清要之地使與名儒耆德接武聯裾人皆指
臣叨塵臣亦自知慚惕若復超越資序過被寵榮臣獨
何人而敢安處況吏部天官之職尚書文昌之貴非得

四百七
賢傑難副東求豈伊愚臣可當劇任伏望陛下憐臣寡
薄察臣懇誠特回誤恩以安拙分臣誓當糜殞仰答恩
私取 進止

第二劄子

臣以伏覩中書錄黃蒙恩除臣吏部尚書即具劄子辭
免尋准閣門告報令授告身臣回牒閣門居家聽命至
今累日未奉俞音臣以危迫之情罔避再三之黷竊念
臣少無才識老更衰疲向以多難求閑即有歸田之意
先帝還其郡印陛下擢寘近班曾未踰時入陪法從既
無報效固已厚顏豈意誤恩復加殊寵不唯衆譏其忝
冒臣亦自畏於滿盈況無德而祿者臣下之殃爲官擇
人者朝廷之美臣雖不敏此義敢忘伏望陛下曲徇物

情特回天造寢臣新命俾守舊官則臣當誓竭愚忠死而後已臣無任

辭免樞密第一劄子

今月二十七日夜戌時閤門告報蒙恩除授臣中大夫同知樞密院事者聞命驚惶如墜淵谷伏念臣天資淺陋學術荒踈自忝近班未踰三月固無毫髮之效仰矚拔擢之私近除吏部尚書已是不遑寧處累黷天聽詔不許辭方將勉勵疲駑效勤銓綜庶逃尸素之罪免爲中外所嗤豈意聖恩復加大用况唯樞近之職鄰於公相之尊預贊萬機寔司兵本宜得非常之士以副知人之求臣伊何人敢當斯任不惟臣自取顛覆亦恐上玷聖明臣之血誠蓋在於此方寸恐迫言不能文伏望聖

茲特賜俞允臣無任

第二劄子

今月初二日准學士院降到詔書一道以臣辭免恩命
事所請宜不允者伏念臣稟量至狹賦命數奇鼯鼠之
技多窮鉛刀之銛易頓英廟擢居言路旋被左遷先朝
累玷要官曾無微效近日遭逢之盛已懷盈滿之憂若
復過被寵榮則必速貽顛覆失微臣素守之分累陛下
知人之明內負寸誠外愧清議臣之勤請蓋在於斯伏
望陛下深察愚衷亟停新命俾圖實效不采虛聲豈獨
微臣受恩誠亦有勸多士

第三劄子

今月五日伏蒙聖恩差入內供奉官勾當御藥院閻安

封回臣所奏辭免劄子仍宣聖旨已行之命不許辭免者中使及門隣里驚歎奏章還賜詔旨丁寧恩寵逾涯感深涕下伏念臣本無儒者難進之節非有古人廉退之風但以素乏長材不可遽當大任必速負乘致寇之辱將招折足覆餗之憂上玷國恩下貽身咎所以披瀝肝膽罔避譴誅庶幾螻蟻之誠感動高明之聽伏望特回睿眷曲徇愚誠亟寢殊恩俾圖漸進則臣當誓竭旣衰之力仰疇從欲之私臣無任

辭免密賜劄子

臣今日晚伏蒙聖慈特降中使宣諭以臣於邊事勞心賜臣酒果及御封合物仍不許辭免者臣才識無取齒髮衰殘報國雖竭於疲駑臨事未免於踈闊今來鬼章

西百六十一
就獲皆由聖德所加臣獨何功曲蒙天獎密賜御封合
物尤不敢當承命震惶殞越無地況今西夏猖獗尚聞
黠兵方將動衆行師可謂主憂臣辱臣當待罪自劾豈
宜復受異恩伏望聖慈察其至誠追回所賜庶幾不至
顛覆亦使愚分少安若將來西事平寧臣亦受賜未晚
所有御封臣不敢開專俟回進取 進止

求退劄子

臣自蒙聖恩拔居宰輔日思報效幾忘寢養然而才薄
望輕任逾其量思慮差錯過咎滋深負陛下知人之明
失衆人責望之意加自去秋已來衰病相仍日就羸瘠
雖勤醫治終未復常蓋緣器小易盈祿厚殃至若不量
力自請必恐愈致顛覆伏望聖慈特矜危懇曲貸餘生

許解繁機假以便郡尚覲桑榆之效仰醜天地之恩臣
無任

辭免右相第一劄子

臣今日聞已降制命除授臣通議大夫守尚書右僕射
兼中書侍郎臣前日蒙延和賜對在臣榮幸已深展葵
藿就日之誠獲犬馬戀軒之願但以未知驅使去處不
敢別叙懇私豈意上誤眷懷遠爾復加圖任竊念臣虛
名過實多病早衰當兩官臨御之初與羣賢接跡而進
旋蒙聖獎驟賓台司曾無輔翼之功竟以疲羸去位俄
膺閫寄復敗邊謀尚屈國章俾司宮鑰重以精神昏耗
方求閑僻自安忽蒙賜詔召還敢不力疾入覲目盲齒
豁形瘠體臞聖念亦必矜憐在廷之所共見豈可彊顏

冒寵據位養病將何以稱副具瞻表儀羣辟不唯取笑中外當須別致人言伏望聖慈特回睿恩收還新命除一便郡俾養羸軀全陛下知人之明遂微臣量力之分

第二劄子

臣昨日入劄子辭免新命未蒙俞旨今日再蒙差中使傳宣令臣四日供職竊以宰相之任繫國重輕得人則天下平康曠職則彝倫失序故大車克載者積中不敗鼎足可任者美實不傾所以人主慎於旁求臣下豈容虛受愚臣向蒙東拔亦嘗濫處此官報君無毫髮之功負責有丘山之重僅能逾歲出守外藩去國又將五年臣已倍增老態加之精神昏耗衰病支離當時已見非才今日曷堪復用蓋負重致遠者先須量力毀瓦畫墁

者安得食功在於賤藝檐夫亦須審已而受況於清朝
輔弼寧當忍疾冒居伏望聖慈察臣至誠憐臣知分特
回寵命別擇賢能用昭則哲之明以輔無疆之美臣無
任

辭免太行太皇太后遺賜

臣伏蒙聖慈特差中使梁貫之等頒及太行太皇太后
遺賜伏緣太皇太后上僊臣子之情方深摧慕更復何
心忍當厚賜況今修奉山陵賜資兵衛溥及羣臣費用
極廣臣忝居輔弼尤當體國伏望聖慈特賜追寢臣無
任

第二劄子

臣昨日晚輒具劄子陳免太行太皇太后遺賜伏蒙批

降聖旨不許辭免伏緣臣方自外藩入居宰席纔及兩
月勞效未施難與同列諸臣均膺重賜況臣賦分寡薄
貧素久諳近於忝命之初已蒙寵賚甚厚今若併有叨
竊寔恐別致咎殃臣今欲乞獨將所得回納或恐可助
修奉山陵萬分之一伏望聖慈特垂開允俾臣少安愚
分不至顛殞臣無任

乞貶一小郡或閑局差遣

臣自秋初叨蒙召命俾復宰司尋曾量力自陳再三不
敢就位實慮別致人言上玷恩獎累蒙中使宣召不許
辭免逼於兩宮詔命輒自寵榮力疾領事昨日方聞先
時果有臣僚章奏糾臣咎愆臣若自知稍明必須即時
堅避度德不審竊位至今又況臣之衰殘近日愈甚臨

事昏錯往往自慚必知無補聖猷豈當尚妨賢路臣之
罪戾愈久愈深伏望聖慈推覆載之恩廓保全之賜貶
一閑局或小郡以安微臣之分以懲貪冒之非臣無任

第二劄子

臣伏蒙聖恩特遣中使賜臣詔書以臣乞貶一閑局或
小郡特賜不允并宣諭臣不須再入文字者伏念臣才
輕德薄多病早衰自叨宰執以來益爲職務所困竊位
已將五月輔政訖無寸長厚祿寵名曾微補報日增月
積漸至愆尤上辜陛下東求下愧士民責望又况受命
之始已招彈擊之言自揣不明以至今日若更苟自容
養則是靡顧廉隅將何以贊翊聖猷表率多士伏望聖
慈縱知人之哲推從欲之恩察其至誠退之以禮俾居

閑局幸延殘朽於桑榆儻獲一麾庶答生成之毫髮臣
無任

第三劄子

臣伏蒙聖慈以臣再上劄子乞一閑局或小郡特降中
使賜臣詔書及宣諭已指揮諸處不得收接文字所乞
必不允從者衰病之臣進退無取累煩天聽義不容誅
尚蒙詔諭丁寧未忍遽行黜免仰戴睿眷慚懼交深然
有未盡之誠難避再三之瀆竊以宰相之體當以名節
自持庶可表率臣民助揚教化未聞爲人彈擊而敢晏
然自居況於本朝多有故事臣嘗親見仁祖以來杜
衍以諫者所論即時外補文彥博爲唐介面奏旋守近
藩蘇頌得守閑官猶爲近例彼皆任用未久但以人言

而去況臣實有疾病不比前人只緣不早自知所以
方請罪非敢輕懷去就別有邀求在臣懇切之至誠質
諸神祇而無愧臣若即今罷出猶能存摺紳廉耻之風
若更冒昧偷安必將貽聖明圖任之悔伏望陛下曲全
士節循舉舊章不容疲暗之愚臣有屈朝廷之常典察
臣陳請特賜允俞誓殞微軀仰疇洪造臣無任

乞罷相劄子

臣去年六月蒙恩嚴召賜對崇政殿嘗以衰病自陳數
日之間再叨宰弼尋亦累奏辭免情懇備至不獲俞音
黽勉就職僅將一年迄無寸長上裨聖政而自今春以
來衰病浸加形體疲羸飲食減少職事繁劇難以支持
又況神職昏耗思慮顛錯事多遺忘耳目不明自慚尸

素朝夕惶懼伏惟 皇帝陛下天縱睿明卓然上聖宜
得非常之佐以輔太平之基衰病之臣將何所用伏望
聖慈特賜罷黜少逭愚臣竊位妨賢之罪臣無任

第二劄子

臣前日以衰病無補乞賜罷黜伏蒙聖恩特降中使賜
詔不允者伏念臣忝命之初已縈疾疢竊位之後寢覺
衰殘蓋由任過其能名浮於實憂勞倍切思慮愈昏至
於神識俱疲氣血耗散歷使醫工診視皆云心脉短虛
又云心爲天官不可少有勞損諸臟之病莫不由之臣
亦自思其實如此緣臣職兼兩省日贊萬機心氣旣虧
何以任事不敢自求生理唯恐上誤朝廷須至瀝懇自
陳必祈罷免臣方獨當宰柄不容連日養痾伏望聖慈

早賜俞允臣無任

乞宮觀劄子

臣昨以衰病乞補外郡伏蒙聖恩差知潁昌府地近事簡深爲優便而臣自到任以來私家蓄撓喪亡人口而臣因此愁惱腹疾屢作又臣素患右眼青盲近日漸侵左眼視物茫茫如隔重霧凡案牘詞訟文字稍小皆不能辨若更勉強職事必恐漸至喪明若自求安養又恐上辜委任伏望聖慈特除臣一宮觀差遣尚俾叨竊祿食稍得將養仰覬天地之恩曲垂矜允臣無任

小貼子

臣之右目失明已久衆人所知因左目苦於獨用遂亦昏暗醫方有說謂當閉目不視久之方可望愈若蒙特

允所請俾得稍遂安養則庶幾不至盲廢唯望聖慈矜憫

第二劄子

臣七月三十日伏蒙聖恩賜臣詔書一道以臣乞宮觀差遣不允所請者愚臣殘朽輒自請於便安聖詔丁寧迺優加於訓諭恩私曲被感懼交深尚餘迫切之誠罔避再三之瀆竊念臣右目全瞽衆人共知比日以來左眼復暗凡有奏報文字皆令子弟代書至於牒訴狀詞亦須人吏傍讀顧職務之多曠在官守以何安仰恃至仁敢求開局覬脫簡書之畏易圖醫藥之功庶幸痊除稍存瞻視伏蒙皇帝陛下曲全體貌猶示眷留載唯君父之慈捐軀莫報第以藩宣之寄力疾難居儻容竊祿

以養痾或免坐盲而終廢必祈矜憫特賜允從

乞宮觀第三劄子

臣屢請閑官實緣衰病再頒溫詔特示矜容戴上聖之深慈在愚臣而易稱凌兢失措跼蹐無容臣久積愆尤近蒙寬貸仍叨重寄靡易寵名方圖竭節以報恩詎敢偷安而避事但以綱條所領省視爲勞恐將治之失時或盲瞽而遂廢尚貪祿食未即退休猶恃至仁曲憐舊物儻俾琳宮之散局得爲聖世之幸民誓殞微軀仰禱洪造臣無任

乞國醫高章服色劄子

臣近蒙聖慈憫臣還自炎州久嬰疲瘵特降中使宣押醫官高章用藥醫治臣上荷聖恩專於服餌雖手足未

遂而臟腑稍安飲食甘美已見功效臣私家亦嘗薄備
錢物延佇本人而章自言恭被聖旨不許承受臣察其
日夕究心糜費湯劑實不遑寧所有臣將來伏遇天寧
節合得冠帔恩例欲望聖慈許與本人改換章服使臣
稍報其功俾之醫治冀獲痊平然臣方起罪廢輒冒聖
聰雖深僭越蓋恃恩仁儻其肯受私家錢物臣亦不敢
更有塵瀆區區之誠覬遂矜允干冒天威臣無任

范忠宣公文集卷第七

范忠宣公文集卷第八

啓狀

賀光州石郎中得替

伏審解符劇郡奏課中宸方脂牽之有期阻班荆而伸
餞矧又隣於封壤復幸託於葭莩深荷庇存殊增感戀
伏惟某官清規表俗雅量鎮浮屢更共治之權藹著于
蕃之績鋒車入覲宜多獻可之謨芝檢頒恩佇被陟明
之典炎敲在候保練是期嚮徃之勤敷陳曷罄

答門生改官啓

某啓向以輕言輒揚善最果遷美秩彌慰下衷馳慶幅
之未遑辱華牋之首及感銘交至歎叙奚殫

謝潘著作啓

三百十
忠宣集卷八
伏審奏課宸庭陞華芸省伏惟慶慰某官清規表俗雅
望映時果膺當宁之知峻被出綸之命佇騰驥步別迓
龍光先沐榮音深感素

謝王長官啓

言念高風久阻牢想空馳幸茲官守之隣稔服民謠之
美徒懷矜式闕奉音題豈圖謙眷之隆特貶長牋之貺
愧銘交積敷叙奚殫

回蔡州胡完夫史君啓

某比者官忝新名職還舊物恩榮併至衰拙何堪荷湔
滌於君仁賴吹噓於朋好此蓋知府學士道充在已恕
及於人愍同志而不遺借片言而爲寵致茲朽質復玷
清途深蒙引重之私莫識疇知之地仙山重到恍如丁

令之歸宣室召還行聞賈傳之命尚賒瞻晤更冀保頤
回時狀元啓
伏審射策明庭冠名多士伏惟慶慰狀元廷評識臻道
奧學洞聖源旦暮昌辰超騰夷路仁義之澤將兼善於
斯民金王之聲已聳聞於海內承風竊抃馳慶未遑辱
牋問之先臨荷謙私之過厚佇膺大任以耀吾儒瞻頌
之勤敷宣曷究

回王郎中

右某言念幸居仁里义服於聲猷邈守官箴阻親於風
矩徒積懷賢之素闕伸置牘之儀豈意搗謙遠貽榮翰
欣審頒條之暇妙臻視履之祥恭惟某官才識高時公
忠奕世屢領蕃宣之寄浸深旒扆之知側聽褒遷式符

四百四十
八宣集卷八
瞻頌披承尚阻保鍊爲宜

別京東監司赴西臺啓

右某啓綿力支離輒露投閑之請綸言溫厚遽推從欲之恩事與願諧感深涕下伏念某賦性迂闊遭時盛明徒以家聲蚤塵器使諫垣將幕曾屢試以無堪澤國山城迨三黜而何補以勤禔拙沉迷簿領之勞有過知非憔悴風濤之險尚獲神明之殛再罹嗣息之殃悲苦纏心驚惶失志畏郡條之瘵曠累部使之庇容陳力知難叫九閭而瀝懇量能授職叨一札以頒榮解劇東藩分班西洛身閑名美猶肅臺儀祿厚責輕真同吏隱此蓋某官義均錫類德重包荒曲全衰晚之蹤俾這譴何之或青泥脫翼敢忘吏部之仁斗水活鱗永識監河之賜

載思感遇罔罄敷陳

到河中謝雍帥劉龍圖

右某祇奉朝恩誤膺州寄獲依大庇竊抃下風恭惟某
官盛德映時英猷冠古夙蘊致堯之業暫膺分陝之權
化茂棠陰已坐康於疲俗寵登槐府行入贊於重熙某
受命云初棲蹤有幸尚祈葆輔式副傾瞻

謝延帥太尉

右某祇奉朝恩誤膺州寄獲依大庇竊抃下風恭惟某
官勲業光朝公忠映古顯被凝旒之眷寵分推轂之權
仗鉞專征久已寬於宵旰追鋒促召行入贊於樞機某
受命云初趨承尚阻更祈葆輔式副傾瞻

謝提舉茶場陸奉議

右某祇奉朝恩誤膺州寄獲依大庇竊抃下風恭惟某
官蹈道深醇賦才英敏夙蘊經綸之業早膺簡注之求
攬轡宣風已坐豐於邦計泯封促召行入踐於禁林某
受命云初棲蹤有幸尚祈葆輔式副傾瞻

回同州知府朝請

某忝恩移郡揆日頒條鄰大國之樂封託洪河之餘潤
恭惟某官清規表俗雅望映時被乃聖之深知膺惟良
之優寄佇還近侍式協僉言某稅駕方初瞻風徒切未
伸竿牘之懇遽貽金玉之音愧荷所叢敷陳罔罄

謝陝州知府大夫

某此者蒙恩假守取道之官既獲望於下風復驟承於
異眷伸講故人之好盛敦主禮之優逮爾睽違徒布龔

黃之治入參近侍行並徐嚴之游某方稅單車適遙外
屏未綴荒蕪之懇先垂華藻之音愧荷所叢敷陳罔罄
回新鳳翔知府范學士

某分符守郡竊愧誤恩揆日頒條獲遵成矩內惟天幸
益仰賢標恭惟某官厚德鎮浮高才名世早升華於禁
省已深束於帝心屢殿大邦藹聞佳政側聽鋒車之召
入陪法從之嚴某稅駕方初瞻風徒切置牘之儀未展
摘華之問遽臨荷謙眷之過隆祝珍調而倍切載惟欽
頌曷罄敷宣

回大寧知監張奉議

右某分符守郡揆日頒條懼衰拙之瘵官愧朋知之爲
地未馳謝懇遽辱榮音荷謙眷之載隆企賢風而增慕

方賒晤對更冀保調佇迓寵休式符言願

到慶州謝兩府啓

左僕射

衰年屏迹漸謀三逕之歸邊鎮分符誤被一麾之寄寵
還近職榮屈舊邦光輝已逮於覆盆歲月徒驚於過隙
載量忝冒唯極震驚伏念其錄錄無能規規自守涉世
但憂於蒿目觀時獨苦於蓬心入備諫臣言未良於藥
石出宣使指功莫著於涓埃幅巾將遂於息肩窮巷唯
期於沒齒假麾便郡聊燕息於河濱易地名藩使折衝
於境外此蓋伏遇某官夾輔王室澄清化源端委巖廊
大任方隆於柱石和調鼎鉉元功已格於鹽梅啓沃清
衷甄收舊物顧未捐於弱植誠有自於洪鈞晚歲無聊

從任已逾於三黜壯心未已乘時猶效於一鳴過此以
還未知所措

右僕射

河濱樂土方忝於郡章闡外名藩遽持於兵柄念流年
之遲暮還內閣之榮華固陋何勝彷徨失措念某伎能
謙薄藝業迂踈學未啓於斲輪才已慙於投刃蒞官行
法苟全蕞爾之軀問舍求田常有終焉之志偶蒙收用
未忍棄捐禁闥圖書重討論於簡牘邊陲斧鉞方鎮遏
於羌戎此蓋伏遇某官一代名臣三朝耆德廟堂決策
忠言切於借籌寰海具瞻大任隆於調鼎不忘踈賤獲
被褒升過蒙雨露之恩寔自坯陶之力窮通守節志益
固於宵中夙夜服勤功庶期於毫末

右丞太中

憂患飄零分安於退處寵光稠疊特冒於遷升俾還內閣之華復任連城之重年鬢但驚於晚節山川無改於當時恩大莫量懼無以稱伏念某才非應變學昧向方得從諸彥之游適際千年之運擢居言職未能補過而拾遺疆赴吏功不事循名而責實空踰二紀無補萬分乞身猶幸於息肩固位敢希於投足盛時易失久絕望於彈冠舊物不忘猶見收於墜履此蓋伏遇某官保佑一德協和庶方獻納嘉謨奉兩宮之清問弛張大政宜四海之具瞻英賢方處於廟堂朽質誤分於印組桑榆暮景雖自愧於衰遲金石素心誓不忘於顛沛

門下侍郎

公未日乘初節於外

司文禁閣載領於簡編假守名藩謬分於印紱過隙但
驚於歲月據鞍重攬於山川自顧瑣微何勝眷任伏念
某粗觀章句偶繼簪紳賦蕞爾之小才乏超然之遠識
一從吏役常寄迹於萍蓬久負歸心欲置身於桑苧衰
颯已鄰於暮齒施爲何益於秋毫出守蒲津聽訟唯期
於卧閣統臨榆塞觀風遽效於褰帷此蓋伏遇某官望
重本朝功深名教道兼資於文武學洞達於古今歸卧
里閭謝萬鍾之厚祿進登廊廟爲一代之宗臣某愧惟
悴之餘生沐便蕃之異數宣揚明詔思惠養於疲民推
廣上仁務懷來於遠俗

中書侍郎

退安散地雖自棄於明時假守舊藩蓋曲頒於異數職

載升於禁閣任兼擁於連城內典圖書出持符
未忘於墜履餘光俄照於覆盆伏念某學未知方才非
周用投身斥澤豈慕於鷗鵬竊食太倉僅同於雀鼠久
叨任使何所建明流年漸迫於桑榆衰髮已先於蒲柳
出麾河上安閑頗類於幽居促駕塞垣委寄獨司於戎
事此蓋伏遇某官發揮王度裁決政機治達本源兆姓
共勤於農畝謀無遺策四方咸偃於德風致此孱虛竊
膺褒異保完瘡痍固無間於邇遐勉勵筋骸敢自寧於
夙夜

樞密

優游便郡乞身將賦於歸田繁會名區受詔俾專於持
節翰墨方還於近職旌旗復指於舊邦揣已若驚不寒

而栗伏念某學未窺於堂室器自局於斗筲誤被選掄
久更任使驅馳郡國不知髀肉之消荏苒歲時但覺鬢
毛之改數罹憂患自請退閑息駕河濱得逍遙於外補
守藩關外俄統制於中權此蓋伏遇某官平格治功裁
成武德講明萬化常進對於前旒討治五兵欲懷來於
左衽顧茲重鎮尚畀非才莫量天地之私實出陶鈞之
力發生朽質終有待於再榮淬礪鉛刀用或堪於一割

副樞

專城假守方退食於河濱內閣升華遽剖符於關外遲
暮但慙於白首褒遷更累於清時伏念某固陋鄙人飄
零跡跡悟意濫階於朝位奮身本出於儒家游宦積年
坐費太倉之粟躬耕有日行尋負郭之田猷俯仰以隨

人聊優游而卒歲豈宜踈遠輒冒寵榮此盖伏遇某官
協贊九功輔成一德干戈不試獨先堂上之兵夷狄來
庭潛契幄中之筭顧惟邊寄尚付瑣才方隅得預於守
藩廊廟實資於推轂高臺未輟收功終累於九層末路
爭先駑力尚期於十駕

賀左僕射蔡相公

伏審進被命書首登宰席顯赫上公之任澄清大政之
原郡生咸賴於陶鈞盛禮方修於典冊伏惟慶慰恭以
僕射門下相公學臻聖闡道協昌期久平格於泰階實
勤勞於王室居調玉鉉已寅亮於九功榮被袞衣永總
司於百揆某誤分印紱久沐陶甄三事登朝喜平津之
開閣一麾假守阻魏勃之掃門

賀右僕射中書韓相公

伏審寵膺冊命進位鈞衡內親附於兆民外懷柔於四國大賢登用衆望攸歸伏惟慶慰恭以某官學洞九流智周萬變久居宥密克壯謀猷光華果陟於公台感會潛符於夢卜君臣堂陞素尊用於鼎司伯仲埴篲遂同陞於袞職某侵尋末路瞻企餘光假守西陲偶坐縈於符竹緬懷東閣阻進預於簪紳

賀樞密章通議

伏審進被寵榮超升宥密內以講脩於七德外將震疊於四夷應率土之具瞻喜大賢之登用伏惟慶慰恭以某官機籌獨運文武兼資挺生杞梓之材蔚爲廊廟之器果由省闈入踐樞庭協贊治功久預裁於國論發揮

雄略遂專決於兵謀聖時方偃於干戈寵任爰資於柱
石某偶分重寄得附餘光堡戍臨邊方假一麾之守冠
裾就列阻瞻數仞之牆

賀門下司馬侍郎

伏審進被絲綸入登廊廟將致君於堯舜當並駕於伊
周方日月之光明宜風雲之感會伏惟慶慰恭以某官
行造聖蘊學爲儒宗不繫意於窮通久忘言於用捨幅
巾去國燕居將老於洛濱端委造朝大任爰參於鼎足
某側聞新命幸處洪鈞關塞一麾符印尚縻於尺組山
川千里門闌阻曳於長裾

呂左丞光祿

伏審光被絲綸參居衡軸內講明於法度上調燮於陰

陽宜四海之具瞻喜大賢之登用伏惟慶慰恭以某官
直而不撓靜以有謀智周事物之原學貫天人之際出
言藩翰暫分寄於銅符進陟廟堂載入司於玉鉉某喜
聞休命獲處洪鈞違離已歎於累年眷待嘗蒙於一顧
山川脩闊但託意於歸鴻門仞深嚴阻進趨於行馬

回田總管黃走馬張機宜

右某祗奉朝恩復叨邊寄幸朋僚之有賴顧衰拙以何
堪豈意謙私首貽榮翰辱寵褒於華袞荷重惠於兼金
展晤匪遙保頤爲祝

謝提舉茶場陸奉議

比者叨奉上恩併還舊秩棲迹尚叨於封部茲行誠賴
於廢麻揣拙分以逾涯奉訓辭而曷稱此蓋某官義深

錫類德盛包荒軫舊物而不遺借片言而爲寵致茲衰
晚復被柬求社木百圍旣久慚於無用鈇刀再割諒難
必於收功屬便道以之藩阻趨塵而拜賜載惟感戀曷
罄叙宣

回步軍苗太尉

右某此者誤被朝恩再膺邊寄邑里尚存於故老山川
復覩於舊封顧遲暮之何堪蓋獎存之有自伏惟某官
沉潛妙筭卓犖英才擁旌久握於帥權出塞屢分於將
鉞折衝萬里指點虜於掌中制勝兩楹出奇兵於堂上
職嚴武衛任總師干軫舊物而不遺借片辭而爲寵致
茲忝幸曷稱眷私未遑置牘之儀先辱貽音之及載惟
感頌曷罄叙宣

賀秦州范龍圖

伏審光被命書出臨藩閫飭轅門之二令懷罽幕之諸
戎側聞屏翰之賢深協摺紳之望伏惟慶慰恭以某官
才兼文武學洞古今衣冠有待於宗師宇量素懷於遠
業麟符守土已載領於旌麾虎節治兵果嚴持於斧鉞
巨鎮昔推於秦隴提封密邇於河湟壯樓堞以連城列
鞬橐而夾轂某幸聯末契竊慶異恩屬部歡迎望朱轡
而入境故人登用思白首以彈冠瞻詠之勤序陳難旣

賀秦州吳待制赴闕

伏審光膺詔札入覲宸延造朝榮踐於文昌解組遽違
於邊服伏惟戶部侍郎誠開金石文麗丹青啓密勿之
嘉謀處光華之近列分權龜紐時未歷於再朞賜對龍

墀顧已深於三接未遑贊善先沐惠音聞六轡之啓行
屬九秋之方晏勉其保嗇聊慰繫瞻欣戀至深序陳莫
罄

太原到任謝宰相執政

右某啓比膺恩制就易師權仍增書殿之華適付屏門
之重辭榮莫遂彌劇愧慚蒞職云初率皆忝冒此蓋某
官代工有體全舊爲心忘其齒髮之衰付以兵民之寄
初臨藩鎮唯祇畏於簡書夙恃鈞庥更仰資於廟略瞻
頌感激實倍常情

回知鄭州陳龍圖

分服鄉邦方慚竊祿易麾邊閫彌愧優恩宣上化以方
初企高風而徒切某官忠良挺操愷悌存心久翔侍從

之華屢寄藩宣之重未遑馳問先辱緘勝感佩收深敷
宣罔罄

回延帥趙端明

伏審中權報政秘殿升華矧惟耆哲之賢益重專征之
寄高才映古重望冠時久參法從之榮夙寄長城之任
果膺異數益簡上心竝奉綸言別登柄任顧慶儀之未
展辱榮問之先臨感愧兼深敷陳罔罄

西京韓相公賀冬

伏以陽德方升振嘉生於潛戶天端首正候祥氣於迎
雲恭惟某官望重累朝德尊元老方告猷而翊國暫均
逸於留都坐推及物之仁茂集履長之慶顧惟衰跡遠
託餘庥瞻頌收深敷陳罔罄

賀中書僕射劉相公

伏審典冊告廷公台進位欽聆褒制均慰輿情恭惟某
官川嶽儲靈珪璋挺瑞懷久大之賢業際光華之盛時
出入三朝始終一節逮真人之訪落陪

贊襄德

合天心功符世賴具瞻隆於民望注意簡於宸衷果膺
夢卜之求入正鈞衡之任延登揆路升踐宰司論道經
邦告嘉猷於我后奮庸熙載下膏澤於斯民益隆乃聖
之知永輔太平之運屬居藩服阻慶賓闕置牘翹誠敷
文罔喻

賀蘇右丞

伏審光膺制命進轄文昌三事得賢萬方交慶某官德
器端重學術淵深體明哲之姿挺直方之操進退不更

其守言行必本於忠啓沃聖心尊崇王度果繇中憲入
預政機蓋人望之乂稽故輿情之共快載惟欽仰倍越
常倫

簽書樞密王密學

伏審顯膺制綽榮貳鴻樞簡自上心協于僉論某官高
才映世直道事君維古訓而是經輔聖猷而濟果繇
天府入掌機衡躋侍從之清班未容溫席參諧之近
列寔慰具瞻某適遠賓闕阻通慶謁欣企素敷叙奚
周

回工部李侍郎

恭審光膺中詔進貳冬官當賢哲之彙征實朝廷之盛
事行登近益副僉言未遑簡牘之修先辱緘滕之貺愧

銘交至敷叙奚殫

賀趙內翰

伏審光奉制恩榮登翰苑豈特儒林之推重固宜國體
之增華邦寵旣行朝僉胥慰某官器深且博德厚而淳
黨然君子之慈隱若大儒之效果膺芝檢入掌辭林典
章暫繫於發揮民物尚需於康濟顧未遑於修慶愧先
辱於貽賤欣感攸深敷陳曷罄

賀知定州許資政

伏審懇辭機務榮殿名藩爰擇剛辰已開盛府諒惟慶
慰恭以某官純誠亮直和惠敦方重望鎮時精忠體國
雅挾佐王之略克成輔世之功名以盛而不居賢因勞
而思佚暫繫舊德坐鎮朔陲方布上恩已聞於美政再

調元化行副於具瞻竊幸衰蹤匪遙善庇方積懷賢之
抱先煩置牘之儀感愧兼深敷陳罔罄

回文太師

伏審連上奏封懇還政柄雖勞謀之曲至顧體貌之方
隆況已協於康寧敢與聞於去就伏惟某官道行當世
名軋古人早得位以濟時晚未忘於憂國竒兵不再建
宗社之元勳大節可書作邦家之盛福親輔三朝之治
尊爲萬乘之師會初正之清明因上心之恭默爰起大
老以圖久安天下想聞其風廷臣無出乎右長城在望
坐消邊境之虞寶鼎復來自使朝廷之重偶愆和豫稍
倦晨昏浩氣內融明神陰相不假著龜之士已聞藥石
之功遽辱誨音願從高退然而公且雖老不離成周山

甫就封永懷王室蓋義之
在則雖出猶處道可以進
則當止而行矧五詔之丁寧而兩宮之倚注欲立非常
之事方湏不世之謀曾是弱姿徒煩委教再三加命雖
逾考父之恭九十在公尚覺鬻熊之少願回冲揖以就
太平

謝同知樞密院

右某啓輔弼之任必唯其人樞機之權尤慎所與蒙恩
忝冒撫已震驚伏念某賦命數竒受才不敏學古雖專
而踈於接物更事徒久而昧於趨時唯知義命之安敢
意功名之會值遭興運拔擢過優豈茲一介之微可陪
三事之列南箕之名匪實鼯鼠之技易窮自知甚明懇
辭弗獲莫回成命終冒殊私深虞竊祿之譏曷副經邦

之望此蓋伏遇某官權衡萬物高下一心廊廟之間材
適長短之用陶鈞之內器無苦窳之嫌致此孤生驟當
大柄敢不勉濟協恭之議益堅許國之心仰稱茂恩用
醕洪造感銘之素敷叙奚周

又

此者祇膺告命獲貳樞庭越次而居殆非其分徒深形
於懇避終進冒於恩榮伏念某學古甚迂承家不克偶
緣際會亦預招延少也無成蓋乏適時之略長而不偶
殆繇接物之踈空歷四朝未聞一善敢祈晚節併被殊
私進以美官還之要地清途入踐未逾三月之賒機事
與聞乃造八人之列靖言非據靡自違安此蓋某官道
可濟時心唯體國謂技能之雖少且事任之常更陰借

品題使階進用智謀非遠知難就於功名忠義在前敢
自羞於門戶庶幾小補永服下風

賀知河中府王待制

伏審光奉詔綸進居文閣既遷升於顯地復鎮守於名
區伏惟慶慰恭以某官道極淵源學臻堂奧廓高明之
遠識挺卓越之宏才嘉謨沃於上心儒術施於吏事披
文禁闥遂從金馬之游問俗大邦方任銅魚之寄某久
嗟離闊載預交承向風但切於馳情晤語未期於促膝
喜聞持節莫遂造門思詠良多叙陳難旣

范忠宣公文集卷第八

范忠宣公文集卷第九

經解

進尚書解

臣近奉德音俾將前世君臣議論諫爭之言編次進呈
臣以史籍浩博采掇未能遽就而君臣之際莫盛於堯
舜三代故取尚書自古君臣相飭戒之言關於治道者
錄為三十章仍於每章之後輒有解釋或用孔氏注意
或與孔說不同但取理當義通以伸裨補之誠幸陛下
赦其愚而少垂采擇亦聖人不以人廢言之義也

堯典

堯曰咨四岳湯湯洪水方割蕩蕩懷山襄陵浩浩滔天
下民其咨有能俾乂僉曰於鯀哉帝曰吁咈哉方命圯

族岳曰異哉試可乃已帝曰往欽哉九載績用弗成
臣某曰堯知鯀方命圯族而終四岳之言而用
之至于九載然後殛之可以見聖人不以已之智
識出倫過人而違衆獨用也又不以一鯀不職而
遽易三考黜陟之法也蓋人以久則可責其成功
若歲月不久而中易不唯大功不成而黜者亦得
以爲辭然非堯德之大孰能容之故曰唯天爲大
唯堯則之也

大禹謨

禹言於舜曰后克艱厥后臣克艱厥臣政乃乂黎民敏
德帝曰俞允若茲嘉言罔攸伏野無遺賢萬邦咸寧稽
于衆舍已從人不虐無告不廢困窮惟帝時克

註云帝謂堯也

臣某曰孔子曰爲君難爲臣不易如知爲君之難也不幾乎一言而興邦乎又君牙曰思其艱以圖其易民乃寧故雖舜禹在上而不敢忽天下之務復相戒以艱難信乎君臣之不易也善言不隱則賢者皆進用衆捨已則君上無過困窮不廢則不困窮者可知以舜之大聖而稱此
惟堯爲能又見乎君道之難也

益曰吁戒哉傲戒無虞罔失法度罔遊于逸罔淫于樂任賢勿貳去邪勿疑疑謀勿成百志惟熙罔違道以干百姓之譽罔拂百姓以從已之欲無怠無荒四夷來王臣某曰有憂虞而後戒捨法度而自任留心於樂逸任人以疑貳忘道以求名違衆以徇已皆中主

之所不爲而益以戒舜可見古之君臣相戒深切而益能盡言舜能善聽也匹庶不以善鬪服鄰里王者不以善戰服戎狄唯無怠荒庶政修舉則夷狄自賓

臯陶稱舜曰帝德罔愆臨下以簡御衆以寬罰弗及嗣賞延于世宥過無大刑故無小罪疑唯輕功疑唯重與其殺不辜寧失不經好生之德洽于民心茲用不犯于有司

臣某曰孔子曰寬則得衆易曰乾以易知坤以簡能有以見居上不以寬則刻急而鮮仁臨下不以簡則叢脞而害政唯好生之德可以服民心民心服則有耻而從化自不犯於有司矣

舜曰咨禹唯時有苗弗率汝徂征禹乃會羣后誓于師
曰濟濟有衆咸聽朕命蠢茲有苗昏迷不恭侮慢自賢
反道敗德君子在野小人在位民棄不保天降之咎肆
予以爾衆士奉辭罰罪爾尚一乃心力其克有勳三旬
苗民逆命益贊于禹曰惟德動天無遠弗届滿招損謙
受益時乃天道帝初于歷山往于田日號泣於旻天于
父母負罪引慝祇再見瞽瞍夔夔齋慄瞽亦允若至誠
感神矧茲有苗禹拜昌言曰兪班師振旅帝乃誕敷文
德舞于羽于兩階七旬有苗格

臣某曰禹受舜命徂征有苗聞益之言遂拜而班
師信乎能取善而不以已智自任矣舞于兩階而
有苗遂格信乎文教之可以服遠至誠之可以感

物矣後之人君有興甲兵危士民與異類爭一旦
之命使生靈肝腦塗地而欲安民阜俗不亦遠哉

臯陶謨

臯陶曰都慎厥身修思永敦叙九族庶民勵翼邇可遠
在茲禹拜昌言曰兪臯陶曰都在知人在安民禹曰吁
咸若時惟帝其難之知人則哲能官人安民則惠黎民
懷之能哲而惠何憂乎驩兜何遷乎有苗何畏乎巧言
令色孔壬臯陶曰都亦行有九德亦言其人有德乃言
曰載采采禹曰何臯陶曰寬而栗柔而立愿而恭亂而
敬擾而毅直而溫簡而廉剛而塞彊而義彰厥有常吉
哉日宣三德夙夜浚明有家日嚴祗敬六德亮采有邦
翁受敷施九德咸事

臣某曰夫修身必在慎思久行慎思則無悔久行則人信然後可以厚族人而善人皆勉思翼戴矣自近及遠之道在此而已知人之難宜察以事而象恭滔天巧言令色者聖人尚或畏之取人之道不可不廣故於九德各取其所長但人君能合而用之則九德皆見於事爲矣

又曰兢兢業業一日二日萬幾無曠庶官天工人其代之

臣某曰夫幾微之不可以不慎也以舜禹之聖尚兢兢業業一日二日而至萬事矧後世之君哉

天聰明自我民聰明天明畏自我民明威

臣某曰聖人以民之視聽爲天之視聽故萬事不

可不察於民也則民之可畏如畏天矣故曰可畏
非民則君之施於民者可不慎哉

益稷

禹曰都帝慎乃在位帝曰俞禹曰安汝止惟幾惟康其
弼直惟動不應僣志以昭受上帝天其申命用休帝曰
吁臣哉鄰哉鄰哉臣哉禹曰俞帝曰臣作朕股肱耳目
臣某曰夫止者所以制動也人君不先自安所止
則好惡無節矣是以君正則臣直先安其止而動
則天下大應之然後可以明享上天之休命夫君
臣相親則萬事治宜其舜之再言而喻以手足耳
目也

禹曰俞哉帝光天之下至于海隅蒼生萬邦黎獻共惟

帝臣惟帝時舉敷納以言明庶以功車服以庸誰敢不讓敢不敬應帝不時敷同日奏罔功

臣某曰萬國衆賢皆帝之臣在帝能舉而用之爾進之以言試之以功然後賞之以車服既明試之有法則羣臣孰敢爭先而進乎孰敢不謹奉於職乎向若舜不如此施爲使賢愚同進則宜其無成功矣

帝庸作歌曰敕天之命惟時惟幾乃歌曰股肱喜哉元首起哉百工熙哉臯陶拜手稽首颺言曰念哉率作興事慎乃憲欽哉屢省乃成欽哉乃賡載歌曰元首明哉股肱良哉庶事康哉又歌曰元首叢脞哉股肱惰哉萬事墮哉帝拜曰俞往欽哉

臣某曰股肱之臣喜於任事則君德日起而百官
安職矣臯陶復戒舜以興作宜慎法度而屢加省
察廼有所成君有明德則良臣獲進君道煩細則
萬事墮惰此有虞君臣相戒之言萬世之成憲也
可不慎哉

五子之歌

太康失邦昆弟五人須于洛汭作五子之歌五子之歌
太康尸位以逸豫滅厥德黎民咸貳乃盤遊無度畋于
有洛之表十旬弗反有窮后羿因民弗忍距于河厥弟
五人御其母以從僂于洛之汭五子咸怨述大禹之戒
以作歌其一曰皇祖有訓民可近不可下民惟邦本本
固邦寧予視天下愚夫愚婦一能勝予一人三失怨豈

在明不見是圖予臨兆民懍乎若朽索之馭六馬爲人上者奈何不敬

臣某曰孟子曰得其民斯得天下矣則民爲邦本也宜矣又曰得其心斯得民矣則可近而不可下也明矣夫人君處於億兆之上而安者非力能制億兆之人也所恃者上下之分君臣之義耳以分義之微而馭兆人何異朽索之馭馬哉苟君失其道則匹夫皆可以勝之矣大凡不明之怨其怨必甚故杜牧言秦民不敢言而敢怒也故聖人達民之情而宣之使言所以圖怨於未見之前也禹不獨行於其身又以訓後嗣慎哉

仲虺之誥

惟王不邇聲色不殖貨利德懋懋官功懋懋賞用人惟
已改過不吝克寬克仁彰信兆民

臣某曰夫聲色貨利人皆好之惟聖人爲能無欲
用人如已則心一而無疑間故動有成功夫以成
湯之德不以無過爲美而以改過爲美不以法令
服民而以寬仁彰信於民則聖王所行與大申韓
雜之家說異矣

又曰德日新萬邦惟懷志自滿九族乃離王懋昭大德
建中于民以義制事以禮制心垂裕後昆予聞曰能自
得師者王謂人莫已若者亡好問則裕自用則小
臣某曰聞善不懈則德日新矣謂人莫已若則志
自滿矣以義制事則不自任矣以禮制心則無暴

矣

咸有一德

伊尹曰嗚呼天難諶命靡常厥德保厥位厥德匪常九
有以亡夏王弗克庸德慢神虐民皇天弗保監于萬方
啓迪有命眷求一德俾作神主惟尹躬暨湯咸有一德
克享天心受天明命以有九有之師爰革夏正非天私
我有商惟天佑于一德非商求于下民惟民歸于一德
德惟一動罔不吉德二三動罔不凶惟吉凶不僭在人
惟天降災祥在德今嗣王新服厥命惟新厥德終始惟
一時乃日新任官惟賢材左右惟其人臣爲上爲德爲
下爲民其難其慎惟和惟一德無常師主善爲師善無
常主協于克一

臣某曰聖人久於其道則爲常德在易常卦之初則曰浚常正凶象曰浚常之凶始求深也故人君欲行常久之道不宜深求於其初則人情不擾而位可保也夫君臣一德則動而獲吉能當天心故武王曰予有亂臣十人同心同德又曰予有臣三千惟一心致一之道在人主推誠待下無偏無黨則衆心咸服故能一矣

又曰后非民罔使民非后罔事無自廣以狹人匹夫匹婦不獲自盡民主罔與成厥功

臣某曰人君自廣以狹人則羣下之情不通一夫一婦不能自盡其情人君猶不能成功況士大夫乎

說命上

高宗命說曰惟暨乃僚罔不同心以匡乃辟俾率先王
迪我高后以康兆民嗚呼欽予時命其惟有終說復于
王曰惟木從繩則正后從諫則聖后克聖臣不命其承
臣某曰人君不以納諫爲難而以從諫爲難能從
諫則羣臣之善皆歸於君矣合天下之善以爲政
安有不聖乎

說命中

說進于王曰嗚呼明王奉若天道建邦設都樹后王君
公承以大夫師長不惟逸豫惟以亂民惟天聰明惟聖
時憲惟臣欽若惟民從乂惟口起羞惟甲冑起戎惟衣
裳在筭惟干戈省厥躬王惟戒茲允茲克明乃罔不休

惟治亂在庶官官不及私昵惟其能爵罔及惡德惟其
賢慮善以動動惟厥時有其善喪厥善矜其能喪厥功
惟事事乃其有備無患無啓寵納侮無耻過作非惟厥
攸居政事惟醇黷于祭祀時謂弗欽禮煩則亂事神則
難王曰旨哉說乃言惟服乃不良于言予罔聞于行說
拜稽首曰非知之艱行之惟艱王忱不艱允協于先王
成德

臣某曰天之聰明廣大含容故人君當法則之夫
號令不慎則貽羞辱甲兵不慎則召寇讐衣裳當
擇人而後賜干戈必省已而後動君能信此則無
不休美夫官及私愛則士不勸爵及惡德則民不
安慮事不可以不善舉動不可以不時矜能眩智

者自滿之道事事有備者消患之本寵小人者欺
罔之言日進非納侮而何志欲革俗而嗜好不免
同俗非耻過作非而何傳說陳此言高宗信而服
行之猶曰非知之艱行之惟艱可見賢臣戒君之
深切也行此數事而中興商祚可見王道之簡易
也

說命下

說曰王人求多聞時惟建事學于古訓乃有獲事不師
古以克永世匪說攸聞惟學遜志務時敏厥修乃來允
懷于茲道積于厥躬惟斆學半念終始典于學厥德修
罔覺監于先王成憲其永無愆惟說式克欽承旁招俊
乂列于庶位

臣某曰夫人君不可不學不學則聞見狹而智不明聞見狹則遠大之言不能用智不明則邪佞之說易以欺況天下之廣萬務之衆不可率已意而治之必當稽先王之成法莫大於堯舜禹湯文武周孔之道人君信懷此道積于其身使邪說異行不能惑亂然後廣用賢俊列于衆職而王道成矣

洪範

五皇極皇建其有極斂時五福用敷錫厥庶民惟時厥庶民于汝極錫汝保極凡厥庶民無有淫朋人無有比德惟皇作極凡厥庶民有猷有爲有守汝則念之不協于極不罹于咎皇則受之而康而色曰予攸好德汝則錫之福時人斯其惟皇之極無虐瑩獨而畏高明人之

有能有爲使羞其行而邦其昌凡厥正人旣富方穀汝
弗能使有好于而家時人斯其辜于其無好德汝雖錫
之福其作汝用咎無偏無陂遵王之義無有作好遵王
之道無有作惡遵王之路無偏無黨王道蕩蕩無黨無
偏王道平平無反無側王道正直會其有極歸其有極
臣某曰人君立大中之道則政化平均民不窮天
而俗皆好善是錫五福于天下也上無偏政則人
無朋比而咸趨大中雖有不合於中但未入於咎
惡皆可容而納於中道故孟子曰中也養不中此
之謂矣夫有才有爲之士患在行不羞進行不羞
進則挾才爲姦足以亂國進其行則其才可用足
以興邦人君又當修德使正人好于我家然後人

人忠宣集卷九
十一
陶善化而下無罪辜人君之心當如止水不作好
惡偏黨其邪正自辨而天下不治者未之有也

旅獒

召公作旅獒訓于成王曰德盛不狎侮狎侮君子罔以
盡人心狎侮小人罔以盡其力不役耳目百度惟貞玩
人喪德玩物喪志志以道寧言以道接不作無益害有
益功乃成不貴異物賤用物民乃足犬馬非其上性不
畜珍禽奇獸不育于國不寶遠物則遠人格所寶惟賢
則邇人安嗚呼夙夜罔或不勤不矜細行終累大德爲
山九仞功虧一簣

臣某曰孔子謂使民如承大祭則君之盛德在不
狎侮而成也人之聰明志意惟可用之於道不役

於無益之事則百度斯正當以賢者爲寶不以珍
奇爲寶又能不忽細微則大功可成君或不卹小
過而憚於改爲終將虧損大德九仞之山起於累
土或闕一簣則妨成功況甚於一簣者乎

無逸

周公作無逸戒成王曰自殷王中宗及高宗及祖甲及
我周文王茲四人迪哲厥或告之曰小人怨汝詈汝則
皇自敬德厥愆曰朕之愆允若時不啻不敢舍怒此厥
不聽人乃或譎張爲幻曰小人怨汝詈汝則信之

臣某曰聖人欲聞其過如此之急也其反身克已
如此之深也雖聞怨詈之言不止不怒而又自修
恭德曰朕之過信如此宜其見美於周公而爲法

於後世也有不信此道之君爲人講張幻惑則信而怒之矣

君陳

成王命君陳曰爾雅風下民惟草圖厥政莫或不艱有廢有興出入自爾師虞度言同則繹

又曰必有忍其乃有濟有容德乃大簡厥修亦簡其或不修進厥良以率其或不良惟民生厚因物有遷違上所命從厥攸好

臣某曰上之化下如風之偃草則上之所向不可不慎也凡有廢興出納之命必與衆人虞度俟其議同而後行之夫忍小則可以成大容衆則可以成德舉直而錯枉則使枉者直民之從上惟視其

所好故孔子曰上好信則民莫敢不用情
以命
令驅之而身不自行則民終亦不從也

罔命

穆王命伯冏爲周太僕正曰慎簡乃僚無以巧言令色
便辟側媚其惟吉士僕臣正厥后克正僕臣諛厥后自
聖后德惟臣不德惟臣爾無昵于儉人充耳目之官迪
上以非先王之典

臣某曰僕臣王之賤官而皆必用正人可見人君
左右不可以便辟邪媚之人爲僕侍也後世宦官
僕侍旣乏正人吉士而人君朝夕與處或訪以事
則以淺狹憎愛之言開導人主又豈止非先王之
典也可不戒哉

右臣竊觀二帝三代君臣議論之際皆言切而意遠宜
於後世治亂無不關也而輒釋以愚臣淺陋之言固不
能發明奧義惟

陛下稽古博達深求其旨則益遠益大將可以比隆虞
夏商周之盛矣惟

陛下留神愚臣不勝大願取進上

范忠宣公文集卷第九

范忠宣公文集卷第十

後學時兆文校正

後學黃姬水校正

後學李鳳翔校正

十五世孫啓又同校

十六世孫惟元同校

記

安州白兆山寺經藏記

予自少喜為山水之遊凡所至有名山勝槩雖遐險必
造焉治平二年自侍御史責倅安陸安之西有金峯山
山有古白兆僧寺時道人垂素為之長老而眾皆稱其

名德寺有本朝列聖御書歲時郡遣從事檢校予到官
纔數月遂自求以往至則愛其林泉幽茂品谷深邃周
遊登覽而邀素從焉惟法堂上木新詢之則素所營也
予益嘉其必葺又至僧堂北隅有老屋若殿而小視其
榜則經藏也素指謂予曰此雍熙中所建有龔御史石
記在焉然地址隩僻蠹腐所滋遊禮者或不能至將徙
而置于大殿之西爽塏之地而新之予詢其期則曰釋
子舉事待信施而集雖志於有成未可必其期也予移
官去
紀謫守義陽距安爲近地僻少賓友思得素
談
而聞其老益高介棄其寺而菴居罕與俗接予
謾以書招之書未達而素已惠然見訪矣語道之暇因
曰昔者欲徙之經藏今已成矣自治平三年冬十月經

始至熙寧四年夏五月告畢計用擅施之財八十萬將刻石以記歲月願公爲我書之予曰師嘗自謂傳達磨之宗不立語言文字直指心源見性成佛奚取五千之書而復新其藏焉又以一切有爲皆如夢幻已則忘之何用歲月名氏之記而求知於後人哉師曰不然夫衆生靜明真心與佛齊等由情著於物故翳而爲病佛猶良醫知病之本皆稱其淺深緩急爲藥以治之今之經猶對病之藥也物之感情無窮故衆生之病無窮則其所治之藥亦無窮此五千之書所以必有也今之經藏猶藥之府也則其棲貯不得不嚴將以應夫病者之求則亦藥之肆也其置設不得不顯此藏之所以必徙而新之也大凡前人有爲必告後人以爲之之意則庶幾

其守而不墜矣此記之所以必作也予聞師之言愛其
有理故爲之書元豐元年冬十有一月壬申記

薛氏樂安莊園亭記

蒲舜都也秦分爲河東郡地沃人富自漢唐至今爲秦
晉之都會固宜人物之多奇也薛氏爲河東著姓世有
顯人皇朝樞密直學士樂安公以清德直道事太宗及
真宗皇帝門族尤盛今中大夫公卽其弟幾子也象賢
繼世詔封五郡三領部使四典巨鎮高識懿行爲時名
臣六十丐閑七十請老以三品歸第乃於郡郭之東北
披岡帶河擇爽塏之地遠城市之喧築室以居焉因所
封之郡名之曰樂安莊前啓重門內曰含幽閉關却掃
非幽人佳客履迹罕至南北分爲二園其西種杏數百

中曰靜居內外重寢妍華芳卉交植於庭踈竹蕭蕭壽
石雪頂開軒對之各以爲名其北曰逸老堂乃公寄傲
宴息之所也其東曰三經堂以藏儒道釋氏之書公以
寄懷於簡冊也其西曰無無堂公自以無欲無營又取
夫莊生之言而名之也東南構亭築址數仞中條太華
列峙如屏其最近者有五老峯因名曰五老榭次東爲
臺登覽曠迥清宵月明千里如晝名曰日月臺莊西北
隅據垣乘高下列蔬圃時使老圃村童引水漑畦名曰
瞻蔬臺積土踰尺周植美楸春花夏陰如幄如蓋名曰
楸壇芳條雲布繁英玉坼垂架飄香深若洞戶名曰醱
醱塢修篁擁徑翠影蒙密新筠解籜嘉色如染名曰猗
猗塢衆木交陰晝不見日清風自來好鳥時下名曰翠

忠宣集卷一
三
陰塢鑿井轉車以汲甘泉或沉浮瓜李揮弄冰雪或烹
茶煮蔬飲啜飴醴外設客舍庖廩庇庫殆將百楹其締
構製作儉而適用潔而不華夏無蠅蚋之苦冬無風霰
之患其服用皆陶器藁床褐裘葛衣俾君子有以取法
小人無所可欲蓋盡得夫郊居之道或霽色澄明開軒
極望或落花滿徑曳杖行吟或解榻留賓壺觴共醉或
焚香啓閣圖書自娛逍遙遂性不覺歲月之改而年壽
之長也此其遊適之樂居處之安又稱其莊之名矣今
士大夫或身老食貧而退無以居或高門大第而勢衰
得歸自非厚積累之德鍾清閑之福安能享此樂哉憑
將老矣固將倣公而退也以人事之難必姑識公之善
處以自勉云公名侏字肅之

王尊道先生講學記

古之哲王一道德以同俗故自鄉黨至于國都皆設學校以教其人凡爲士者自少至長必處于學其所學者惟先王之道則在乎先誠身修己而後有施於人故其仕而立于人之朝也則用其所學以事其君而治其民故其君之所聞者皆先王之道德民之所服者皆先王之教化然後君得以爲堯舜之君而民得以爲唐虞之民矣自周衰秦漢而後學校養士之法旣廢則士之所學不必誠身修己而各務肆其所爲是以邪說怪行得以眩亂乎其間故仕於朝者非一道也致其君者非一術也施於民者無定法也其則至於國異政而家殊俗矣而欲致其時於堯舜三代不亦難哉今之爲士而知

斯者有矣患無位而不得言也有位而言者有矣患乎不能行也若其林野丘園之士能自奮勵篤信先王之道不待上之教化而推其所學以教導於閭里如古之所謂庠序者則見夫滑之胙城尊道先生焉先生讀聖人書窮之三十年五經之旨卓然自得不爲諸儒傳注之所牽其言行淳質亦未嘗有繆於道故滑之學者多歸之先生乃爲之講解俾識其所趨向又作室以延之而名曰講堂俯堂之北則其先君之墓也或者以爲非絃誦之地先生曰吾聞立身揚名所以顯揚也吾孜孜於是道勉其身於君子之途者是使吾親爲君子之親也顯孰大焉苟吾親有知聞吾朝夕講聖人之言於此顧不樂哉又況使鄉里之人瞻斯堂則知吾先君之墓

則吾親之名蓋亦不朽矣先生以是言語予而欲記焉
予昔先生之青衿也其言雖不足發明先生之道而且
不敢以辭故因感學校之廢復樂先生能自奮勵以先
王之道教導其鄉里而爲之記云先生姓王氏名大中
尊道卽其字也時治平四年九月記

序

司馬公詩序

古之君子修身以齊家然後刑于國與天下蓋其言動
有法出處有常子孫幼而視之長而習之不爲外物之
所遷則皆當爲賢子弟猶齊人之子不能無齊言也書
曰積善之家必有所餘慶詩云貽厥孫謀以燕翼子由此
道也端明殿學士司馬公以清德直道名重天下其修

身治家動有法度其子弟習而化之日趨於善蓋亦不
言之教矣又伸之以詩章俾其諷誦警策則其積善貽
謀之道可謂至備宜其子子孫孫世有令人苟尚不能
自修而入於君子之塗者則其人可知矣宏予之子壻
也持公詩求序於予予樂道公之盛德又因以勉之熙
寧八年月日高平范某序

望日示康廣宏

清晨三綠袍羅拜北堂高積善因先烈遺光及爾曹勿
矜從事早當念起家勞修立皆由已何人可佩刀

完美集序

自古國家將興隆平之運建不拔之基者則必上天爲
生賢傑之佐啓佑其主戴翊其世而成非常之功故有

商之興也湯得伊尹高宗得傅說周之興也文王得呂尚宣王得申甫漢之興也高祖得三傑光武得寇鄧唐之興也太宗得房杜肅宗得郭李故皆能光啓皇圖或中興王業至于我朝仁宗皇帝享御綿久道冠百王澤浸四海純誠駿德格于皇天故天將錫我宋以無窮之祚是生良弼以贊襄議定策元嗣置天下於泰山之安神器有覆盂之固時則有若康節張公以清德直道奮於寒儒歷職試位由河東轉運使入爲御史知雜正色抗論以肅朝政仁宗從諫知臣眷公甚厚公感上知遇夙夜思報于時國本未立公因啓建儲之議事未果出典外藩及拜御史中丞復進前說仁宗益愛其言而將行之遂用公爲執政至嘉祐末公旣爲樞密使

長西府會韓魏公爲元宰二府協力以贊丕命 英宗
皇帝遂繼大統公之勲烈輝映萬世乃退身養道十有
餘年康寧壽考薨于正寢而朝廷贈有誥謚有議士大
夫慕公之德者哀有詞祭有文及銘於壙紀於碑而狀
於太史者皆所以述公之功德然尚得其髣髴而未之
盡也至今上特題其碑之額曰清忠舊德之碑然後公
之大節於是乎稱矣國家崇德報功之道於是乎備矣
天下修己爲善之人於是乎勸矣一舉而三善從之可
不謂之美歟在昔人臣立大節成大功爲天下士民之
所稱愛者未必見知於時君居高位席盛寵蒙遇於時
君者未必見稱於士大夫善其初者未必能保其終盛
其名者未必能安其身如公者兼得而竝有之可不謂

之完歟嗣子虞部君集公之贈誥謚議哀辭祭文行狀
碑誌爲上下二卷以藏于家以傳于世蓋孝子繼志述
事之一端矣屬某名其集而爲之序某以先君文正公
有同榜之契而知公行事爲詳義不得辭請名其集曰
完美因以公之大節而敘其說云

銘

布衾銘

藜藿之甘綈袍之溫名教之樂德義之尊求之孔易享
之常安綺繡之奢膏粱之珍權寵之盛利欲之繁苦難
其得危辱旋臻取易捨難去危就安至愚且知士寧不
然顏樂簞食萬世師模紂居瓊臺死爲獨夫君子以儉
爲德小人以侈喪軀然則斯衾之陋其可忽諸

鼎銘

河內之范文正之嗣以薦以享子孫勿墜

青詞

祈雨

天心仁愛遂羣物之常生神道聰明感至誠而善應下
國方懼於耗斲真科曲示於祈禳敢瀝懇以求哀冀轉
蓄而爲福伏念臣欽承君命假領帥權爰當莅職之初
適偶荐饑之後盜賊盈獄餓莩蔽塗賑發將竭於困倉
疲瘵尚虞於溝壑近從初夏復遘亢陽田野焦枯公私
窮蹙豈斯牲之敢愛曾靡神而不宗徒罄羣心未蒙嘉
澍臣之危懼日甚焚惓疾魘虐之方揚嗟民命之近止
叫闐無路躋地何容是用祇叩琳宮虔遵寶籙降九天

之真聖延三界之靈神恭修豺獮之誠仰致潢汗之薦
敢冀高穹悔禍上帝垂慈需爲三日之霖滌此一方之
沴不違物願咸繫鴻私

刑獄

元功默定顧動植之難量大德好生諒祈禳之可格既
昧效官之術敢忘謝過之心伏念臣領郡再期長人萬
室慎罰固遵於國典用刑恐戾於物情或囚繫踰時或
重輕失實或欺誣罔辨或疾苦不聞矧庶獄之繁興豈
斯民之多僻蓋在位乏移風之舉故編氓無遷善之由
積痛憤於九幽貽凶菑於一境敢伸精禱庶格洪休是
用恪奉僊儀嚴陳法供普所衆聖延降上真伏願錫福
庶民降康下土滌園扉之寃滯佐比屋之熙淳更願帝

化所陶不犯畫衣之禁民知遠非常無觸網之愚誓堅
忠孝之誠仰荅乾坤之造

禳謝

大道難名默運生成之化至神莫測潛司禍福之權顧
纖介之微軀沐堪輿之大賜敢忘報謝用致忱誠伏念
臣幼服儒風早蒙道廕職免耕桑之苦身無飢凍之憂
親遇聖明官居繁要姻族百口不逢天橫之蓄仕宦四
方常脫傾危之禍報國蔑聞於績效臨民有愧於循良
自知祿厚而才輕惟懼福盈而禍至是用虔依秘範延
降上真勉修豺獫之誠恭備蘋蘩之薦敢望好生垂德
福善敷恩保家國之和平遂性情之安逸行身迪吉爲
道日新悉均動植之倫咸享康寧之福願堅善行仰荅

鴻私

襁謝

大道難名默運生成之化至神莫測誕彰感應之方是以聖賢益務於畏天材獯猶知於報本竊念臣生居善族親遇明時由父訓以入官荷朝恩而尸祿罪雖多而苟逃禍譴德靡積而濫享休寧豈愚分之能招蓋陰隲之潛佑故敢恭修薄薦延降上真嚴醮席於中宵遵玄科之往範罔揆幽微之品用伸襁謝之誠伏願諸聖垂慈明靈洞鑒察丹衷之懇懇錫多福之穰穰庶乎家族平康身心安泰長幼罔罹於菑害公私常免於訟刑誓堅爲善之誠仰荅難諶之造

襁謝

大道難名運真功於不宰至誠有感通神化以無方敢
稽金簡之明科延降玉虛之真聖恭修薄薦庶達微誠
伏念臣生遇明時幼聞義訓紹簪纓於仕族竊台鼎之
榮名修已安人既慚於成德代工理物固乏於周才常
虞祿厚以貽殃每懼器盈而致覆衰疲感疾蓋盡瘁而
弗勝早曠興蓄亦變調之無效徒欲報君而竭節復嫌
冒寵以妨賢進退惟艱憂思曷濟是用虔遵寶籙恭啓
蘭場祈元造之垂慈覲上靈之敷佑庶俾道由天相輔
聖化以無虧善克世傳守先猷而不墜然後閨門舉族
共臻安泰之祥蒲柳餘生早遂退閑之福誓堅素守仰
荅鴻私

禳謝

洪造無私雖不言而示化至神莫測諒有感而必通虔
遵金簡之儀仰叩璇穹之聽伏念臣幼承道廕長遇聖
時荷恩眷於累朝叨顯榮於三事常念滿盈之戒每希
止足之心爰自去年得辭大政既免觸藩之困幸逃覆
餗之羞雖嘗邁於菑屯亦屢銷於禍釁用舍偶完於素
節退休將遂於本心豈愚慮之能周實神靈之陰祐是
用罄伸丹懇歸命上真尚虞衰晚之多艱猶覬保全於
終吉更願身心康樂家國安寧子孫蒙德慶之祥骨肉
享安平之祉早遂引年之請咸蠲違道之愆俾於衰暮
之齡錫以清閑之福臣敢不服膺聖訓克意善經盡蒲
柳之餘生荅乾坤之大賜

禳謝

洪造難謀降留祥而在德至神莫測召禍福以唯人積
行累功當效聖師之久禱識昏情蔽敢云愚慮之無愆
故僊經開禳謝之科禮典有報祈之祀罔揆桑榆之景
輒修豺獺之儀仰叩高真歸依妙教伏念臣生蒙道膺
品與最靈繼承慶善之門遭遇聖明之世歷塵仕路兩
玷宰司有位無能虛名過實既乏致君之畧曾微及物
之功矧復形憊而齒衰而耄及或刑賞之失當或
議論之過中流弊久長貽蕃匹庶自難知覺釁積纖微
尚逃尸素之誅獲全進退之分豈圖殘朽猶覲安全蓋
君父之深恩亦神靈之密佑敢不追循往咎懺謝前愆
誓堅止足之心永絕貪私之妄伏願上真降佑衆聖垂
慈護持向善之誠開迪自新之路完戰兢之晚節保閑

退之餘生更願家族平康子孫孝謹永賴昇平之化不
逢非橫之殃

禳謝

洪造難謀雖無私而示化至神莫測諒有感而必通靡
量微眇之誠輒覬高明之鑒竊念臣生逢聖世幼習義
方遭遇忝歷於四朝年齒將彌於六紀兩叨言路十領
郡符三總帥權五更使寄驟繇樞筦再陟宰司或持生
殺之權或操刑賞之柄輕重固多於差誤施爲或爽於
中和冒榮寵以踰涯積咎愆而旣久揣分每驚於盈滿
於身宜被於菑殃然猶享寵祿於近藩保行藏於善退
妻室危病旋獲痊安目視昏蒙幸無苦楚旣乏功行之
能致莫原僥倖之曷從上由君父之恩容陰賴神明之

相佑是敢輒伸丹懇仰謝真功伏望聖衆垂慈群靈延
貺更願乞骸遂志養疾如期保家族之平康完桑榆之
晚節普師慈儉仰荅生成

請死

物居過盛必有虧傾器忌滿盈理當顛覆矧無才德宜
取危言猶可自知難逃天鑒伏念臣生蒙道廕長遇明
時世習儒風存心必歸於仁義家傳聖訓立身咸倣於
詩書早承教於父兄晚叨榮於禁近再持宰柄十領州
麾今則感疾顛危垂年遲暮精神荒落手足萎蕤舉必
待人神將去體敢求延於鍾漏冀速返於泉局伏望諸
聖垂慈上靈降佑旦就匱盤之清潔靡惟床枕之艱辛
而況平生絕施設之殃自信無潛藏之慝宣尼嘗曰丘

禱久矣釋氏有云我向則消臣謹當永結勝緣堅
念期爲慶瑞以福善人或有光靈仰裨神化

疏

同天節功德疏

右臣伏以西方妙教寔資有道之因太上真文能益無
疆之筭方正陽之盛月乃誕聖之昌辰延梵衆於精廬
肅道流於淨館潔伊蒲之饌冀調禦之等慈誦靈寶之
篇宜虛空之來相集多詳於帝所符善祝於封人竭螻
蟻區區之誠但瞻禮於北闕祝神堯魏魏之壽願
於南山臣無任

同前

右臣伏以露囊紀節星電標祥當正陽用德之辰祈上

聖無疆之筭集法筵之清衆誦貝葉之真文天子萬年
願固岡陵之遐福封人三祝徒殫螻蟻之微誠

私忌疏文

右伏以奉先追遠敢忘如在之誠供佛營齋庶備薦嚴
之福爰當諱日恭集妙因伏願慧日圓明智燈寂照悟
萬緣之非有了諸幻之無常不染一塵頓超十地

慈聖周祥道場疏

右伏以真遊遽邈奄及於暮周佛事致嚴恭崇於梵果
太皇太后德侔坤載世賴母儀爰當新穀之升始及收
神之旦聖孫孝享昭格於天心率土永懷咸均於孺慕
仰資僊馭式仗勝緣

同前

右伏以僊蹤旣邈奄及於周祥佛事載嚴用伸於永慕
式薦在天之福罄輸率土之心恭惟尊號皇后定策兩
朝叅功十亂高名輝於圖史陰賜被於華夷爰當厭代
之辰虔設淨方之供伏願夙憑覺慧超證真乘悟圓妙
之勝因佑延鴻之寶祚

奉旨詣河瀆西海祈福消菑道場疏

右伏以金輪正覺唯主善而降康玉鏡高真每應誠而
孚佑至誠所達有感必通恭惟皇帝陛下德配乾坤恩
霑動植擁百祥之大順錫五福于群生以道乘禧自天
垂佑宜享襲躡之吉旋臻勿藥之休仗幽讚於勝緣增
無疆之睿筭臣無任

神宗皇帝升遐功德疏

右伏以翠輦超升闐徽音於軒鼎普天追慕想睟表於
堯牆爰憑十號之慈仰薦三清之福太行皇帝伏願常
居金地安住玉京陪五聖之真游佑群生於法界

同前

右伏以乘雲厭代悲僊馭之難留率土摧心攀龍髯而
莫及仗金僊之妙教資玉錡之真游恭惟太行皇帝德
配乾坤恩霑動植新一王之制度復萬里之土疆方不
顯於基圖俄遽遺於弓劒華夷孺慕寰海震哀爰遵乾
竺之文廣集苾芻之衆香花嚴供鍾梵交音仰憑出世
之緣恭薦在天之果伏願逍遙寶地超悟真乘度沙界
之群生佑鴻圖於億世

坤成節疏文

右伏以神光滿室共傳載育之祥梵印傳經遙祝無疆
之筭寶花零亂淨域莊嚴周法界之三千贊壽齡之萬
億太皇太后殿下伏願東朝奠枕南面垂衣如月之恒
爰照臨於四國擬天之運永覆冒於群生

同前

右伏以星流玉宇六宮曾慶於殊祥香散金田萬國共
祈於難老旃檀顯質貝葉翻經獻承露之僊囊布望雲
之法席伏願太皇太后殿下松筠比茂金石同堅房闈
燕居常範圍於天地車書共貫永帶礪於山河臣無任

坤成節開啓文

氣應金成當上秋之既望德符坤正屬聖母之題期肅
披西竺之文共獻南山之頌恭惟太皇太后殿下道隆

華渚慶邁層沙享榮養於先朝翊丕圖於興運式臨誕
節肇紀鴻名臣等志同寅誠深報上虔趨梵宇仰祝
椿齡所覬川至日升擁珍祥而有承天長地久續睿
筭以無疆祇款能仁洞祈昭鑒

范忠宣公文集卷第十

蘇忠宣公文集卷之十一



蘇東坡印

蘇東坡印

蘇東坡印

蘇東坡印



1 2 3 4 5 6 7 8 9 10 11 12 13 14 15 16 17 18 19 20



Inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19 20

TIFFEN Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color

Black



